

I V S T I L I P S I
D E V E S T A
E T
V E S T A L I B V S
S Y N T A G M A .

Altera editio , atque ab vltimâ Auctoris manu,
Notis auctior, & Figuris illustrior.



A N T V E R P I A E ,
E X O F F I C I N A P L A N T I N I A N A ,
A p u d I o a n n e m M o r e t u m .

c l o . I o c . I X .

Cum Privilegiis Casareo & duorum Regum.

DE VESTA
ET
VESTALIBUS
SYNTAGMA.

Altera editio, atque ab vltima Auctoris manu.
Mensis auctoris & Figuræ Illustratio.



ANTVERPIÆ,
EX OFFICINA PLANTINIANA,
Apud Iohannem Moretum.
MDCCLXXII.
Cuius Typographi Censura & Auctoritas Regia.

ILL^{MO} ET REV^{MO}

MATTHIÆ HOVIO

ARCHIEPISCOPO

MECHLINIENSI.



XIGVVM aliquid, & pæ-
nè verens, aut certè ve-
recundans, ad te adfero
ILLVSTRISIME PRAE-
SVL, istud DE VESTA ET
VESTALIBVS: quod ta-
men solus titulus excu-
set, non enim dicam commendet. Res fa-
crorum est: vanorum & veterum, fateor: sed
sacrorum, & quæ nostris etiam piis verisque
sacris faciant illustrandis, aut approbandis.
Illustrandis, quia multa super eâ re in scriptis
olim Doctorum nostrorum: approbandis,
quia cùm illi tantum honorem paucis istis
coactisque à pueritiâ virgunculis detulerint;
quid

quid nos æquum verumque est facere, in devotis Deo puellis, ætate adultâ, voluntate præviâ, quæ diuino cultui corpus atque animum manciparunt? Beata virginitas, quæ cum Angelis de gloriâ certat: certat? imò superat, virtute, non felicitate. quia illorum tota à Dei munere est, istarum ab electione: sine pugna aut labore, illa; ista, à certamine parata; & quæ laudem habere, illa admirationem tantum potest. Iam in veteri Româ, sex aut septem Vestales, tot præmiis aut præconiis insignes: istæ quid? ausim asserere, in solâ Belgicâ supra sex aut septem millia esse, nec fatis etiam dixi. *O illustris portio* (Cypriani verba agnosce) *gregis Christi!* ô flos nunc in terrâ religionis, lucida sidera olim in cælo! quàm vndique vana & profana illa superamus, veritate, aut frequentia? Accipe igitur VESTALES veteres, sed in illis nostras feliciores cogita; accipe tu PONTIFEX meritò, quod Pontificiæ olim & nunc curæ commissum. Certè tu non solum sacris nostris in Belgicâ rector & director præsides; sed huius virginei coetus tua inspectio & arbitratio est. tu ducere, formare, coërcere

pon-

pontificium habes ; & tot millia quarum precibus falus publica nititur , tuâ auctoritate & tutelâ nituntur. Non te mouebit , quòd multa , imò pleraque ista, priscae litteraturæ sint : ne cense , optime Antistes , alienam à Christianis vsibus : imò ornamentum , imò adiumentum hæc talia , germanæ Pietatis. Vides Græcos Latinosque illos religionis nostræ Duces aut signiferos ? plerique omnes hac doctrinâ non insigniti tantum , sed insignes fuere : Tertullianus , Cyprianus , Ambrosius , Augustinus , Hieronymus : & è Græcis , Clemens , Iustinus , Basilus , Gregorij , & quotquot ex illo aureo æuo est nominare. Cur diffugimus hodie aut damnamus ? Neque enim solum voluptatem ex istis aut scientiam probi prudentesque , sed vsum quærunt . & vt floribus alij ad odorem aut adspectum tantum , apes ad mellificium , medici etiam ad salutem vtuntur : sic illi amœniora hæc studia traducunt & aptant ad serium animorum fructum. Quæ iacent valdè , vt pleraque honesta , in publicâ hac tempestate & bellorum nimbis : sed

tu ac tales (nam & hæc tua cura est) tuemini
atque erigite, & Ecclesię dignitatem si sal-
uam vultis, etiam illa. Neque semper profe-
ctò hæ procellæ. & erit tempus, quo

— *redeat Concordia, Virtus,*


Cumq; Fide Pietas altâ cervice vagetur.

Deus citò donet: te autem ILLVSTRIS-
SIME ET REVERENDIS-
SIME PRAESVL, decus
& columnam huic statui seruet. Louanij,
Idibus Iuniis, ∞. MDCIII.

I. LIPSIVS PP. cliens.

AD

AD LECTOREM.

APE breue hoc Syntagmation, quod est de vetustissimis & celeberrimis item sacris. Quadam alijs sparsim super iis libarunt: sed libarunt: nos ordine & methodo rem aperuimus, atque adeò plenè dedimus, ut licuit obliuia ista & fugitina. Siquid me quoque fefellit, aut fugit: sit venia. nemo ita industrià aut ingenio potest, ut omnia colligat, intelligat: nec veto, imò posco, ut manum alius addat. Benignè in me consulet, si quis monebit aut suggeret. à te peto tantum,

Ne mea dona tibi studio disposita fideli,
Intellecta prius quàm sint, contempta relin-
quas.

Nam multi indicant, priusquam legerint: quid? etiam priusquam inspexerint quidam. contemptores scilicet honestarum artium, & quorum voto iamdiu Doctrina omnis sit funus. Non audi ò Deus, neque solem hunc è mundo tolle.

INDEX

INDEX CAPITVM.

- CAP. I. *Quid Vesta? aliis Ignem, aliis Terram esse. de quæ eâ priscæ fabulæ.* pag. 1.
- II. *Quibusdam & Venerem dici. Sed Vestam, pro Igne siue Foco, antiquitus & passim cultam: & à quo exemplo Romæ.* 6.
- III. *Numam templum sacrasse, atque id rotundum: Viris noctu interdiktum. Nulla ibi statua: & tamen vulgò eius imago.* 9.
- IV. *Aliud ab Augusto Vestæ templum. item de Regiâ, & Atrio Vestæ.* 13.
- V. *Vestales sacerdotes, Virgines captas. quo æuo? quo numero?* 16.
- VI. *Alia in capiendò spectata, seruataque. Sortem, aut Oblationem interuenisse.* 18.
- VII. *Disciplina captarum: gradatio & ascensus: tempora ministerij: & Virgo Maxima.* 22.
- IIIX. *Munera earum, primumque tutela Ignis. Perpetuum hunc fuisse: si defuisset, pœna Virginum & flagra: iterumque instauratio.* 24.
- IX. *Seruabant & imperij pignus, Variâ interpretatione: et si plerique ad Palladium trahant. Quid illud, vnde, ubi?* 28.
- X. *Sacra etiam assidua faciebant. an & Aquæ curabant? an Draconi? hæc inquisita: & aliquid de Deo Fonte.* 32.
- XI. *Premia & priuilegia earum. Ius testandi, Licetor, Carpentum, aliaque data.* 36.
- XII. *Item ornamenta aut insignia: ut Vitte, Purpura in veste, Stipendia & Agri, Auctoritas in deprecando.* 39.
- XIII. *Contrà, Pœnæ cum peccassent, cum æuo variæ: sed sollennis & nobilis à Tarquinio Prisco. Pontifices arbitros fuisse: conuictam, defossam: & quæ huic rei.* 43.
- XIV. *Quando Vestales deserint? in Arnobio nodus, nec solutus.* 49.
- XV. *Alibi Ignis cultura, & simulacrum Vestalium.* 51.

IVSTI LIPSI

DE VESTA

ET

VESTALIBVS

SYNTAGMA.

CAP. I.

*Quid Vesta? aliis Ignem, aliis Terram esse. de quæ
eâ priscæ fabulæ.*



INTER antiquas religiones, eam
quæ *Vestam* spectat, comperior
vel præcipuam fuisse: Romanis
quidem: & ergo ad prisci æui
scriptorumque lucem facere, si-
quis illustrat. Suscepi hoc fine:
pergite manus & calame hanc
quoque operâ nauare iis, quos
vetus & melior illa doctrina capit; & simul Sacris quo-
que nostris auctoribus, qui hæc tangunt in occasione, fa-
cem aliquam præferre. VESTA igitur, plurimum sensu,
Saturni ac Rheæ filia, sorores habuit Cererem & Iuno-
nem, ipsa natu prima: fratres, Plutonem, Neptunum,
A Iouem.

1. Biblio-
thec.

Iouem. Ita Apollodorus : itemque Ausonius;

Vesta, Ceres, & Juno, secus muliebre, sorores.

Vides primam locari : at Ouidius in ordine aliquid mutat;

Ex Ope Iunonem memorant Cereremque creatam

Semine Saturni, tertia Vesta fuit.

Nam Ops eadem, quæ Rhea. Alij tamen dissident, & Vrani siue Cæli vxorem Vestam faciunt : mystica hæc sunt, vt verbo absoluiam, variè tradita, sed in re & interpretatione concordant. Nam Cæli vxor Terra fuit : ex iis

1. omnia nata : & ¹ Vestam ipsam passim Terram interpretantur. Itaque & cum Cerere quidam confundunt, quæ ipsa est Terra : sed distinguenda, quòd hæc terra dumtaxat fertilis & frugifera ; illa (Vestam dico) ea vniuersa. Inde & nomen petunt. vt Ouidius :

Stat vi Terra sua, vi stando Vesta vocatur :

quasi, quòd vi sua stet & immota libretur. Alij (vt Ser-

In I. Æn. uius) *quòd variis vestita sit rebus. Ipsa enim* (inquit) *dicatur esse Terra.* Plato huc facit : qui *undecim Deos, choro*

In Phædro. *sequi* : at, inquit, *ἡ ἑστία ἐν τοῖς θεοῖς μόνη* : *manet & sistit Vesta in Deorum domo sola.* Quam domo? hoc mun-

Lib. III. do. quod Arnobius explicet : *Terram nonnulli Vestam pronunciant, quòd in mundo stet sola, ceteris eius partibus in mobilitate perpetuam constitutis.* Vbi & ipsa Platonis verba expressa. Qui Plato, nescio an hac mente iterum : *ἢ ἡ ἑστία ἐν τοῖς θεοῖς μόνη* : *manet & sistit Vesta omnibus diis habitaculum sacrum est : nemo igitur secundaria quedam templa iis instituatur.* Et videatur hic distinguere à Terrâ, & Ignem. facere, vt mox è Plutarchi verbis discas. Nā hæc quoque

crebra

crebra imò passiva opinio, Vestam Ignem esse. Ovidius:

Nec tu aliud Vestam, quàm viam intellege flammam.

Vox Græca adsonat, qui ἔσδω *Focum*, siue ἐχάρακον appellant. Cicero: *Cumq̃ Vestā quasi focum urbis, ut Græco* III. De Legib.
nomine est appellata, complexa sit. Iterumq̃ue alibi: *Vestā* II. De Nat.

nomen sumptum est à Græcis. ea enim est, quæ illis Εστία dicitur:
visq̃ eius ad aras & focos pertinet. Seruius pariter, ad illa Virgilij: *Cana Fides, & Vestā: Vestam,* In I. Æn.

Religionem dicit. quia nullū sacrificium sine igne est, ipsaq̃ue in omnibus inuocatur. *Vestā autem dicta* ἑστίας
ut digammos sit adiecta: sicut Er, Ver, Enetus, Venetus.

Est igitur ista quasi *Publicus focus*, sicut priuatim in ædibus alij consecrantur: eoq̃ue haud absurdè Macrobius, III. Sat. cap. IV.

Vestam inter Deos Penates, aut certè comitem eorum, recēset. Sed quomodo Vestā, Ignis? duplex opinio. Prior ad ipsam Terram restringit & refert: in quā Phurnutus.

quod vis ignea, inquit, *quæ in mundo est, hinc nutriatur, ac per hanc subsistat: aut, quod fecunda Terra etiam animalium sit mater, quibus vis ignea vitæ est causā.* A

priorē illā causā Dionysius est. qui *Vestæ ideo sacrari* Lib. II. Antiq.
Ignem tradit, ὅπιν γῆ τε ἔσθ' αἱ θεοί, ἔν τ' ἐν μέσῳ κατέχευ' αἱ
κόσμος ἔπον, τὰς δὲ ἀψὲς ἔμεταρσις ποιεῖται πρὸς ἀφ' ἐαυτῆς:

quod cum Vestā sit Terra, atque ea medium mundi locum sortita, accendat è sese superiores illos ignes. Nota sententia plurium veterum, è Terræ vaporibus aurisq̃ue sidera nutriri & exardere. Hac ipsā mente fabula, *Vestam nutricem Jovis* esse; Marciano Capellæ scriptum. Aliter Lib. I. Philol.

paullò Pythagoræi, qui Ignem medium, non Terram faciebant (nobilissimum quippe elementum in loco tali esse debere) atque ipsum Vestam dici, & custodiam Iovis

II. De Cæ-
lo, c. XIIII.

In Numâ.

appellari. Aristoteles hæc tangit: & plenissimè exsequitur Plutarchus, qui lucem ei donet. *Dicitur, inquit, Numâ Vestæ ad orbiculari formâ igni perpetuo custodiam circumiecisse, non ut adsimilaret Terræ figuram, tãquam ea Vestæ esset, sed uniuerſi huius Mundi, cuius² medium Pythagorici Ignem esse arbitrantur: atque id Vestam appellant, & unitatem. Terram autem neque immobilem esse, neque in medio circumlationis sitam; sed in orbe circum ignem suspensam, neque inter eximias aut primas mundi partes censendam. Eadem Platonem volunt iam senem sensisse de Terrâ, tamquam in alio loco sitâ; mediam autem dignissimamque regionem alteri alicui præstantiori conuenire. Summa horum, Terram mediam non esse, Ignem esse: atque hunc Vestam dici. Sed altera Phurnuti opinatio, in Terrâ ipsâ mixtum esse Ignem. pro quâ & Seruius: *Vestæ enim dicitur esse Terra, quam Ignem habere non dubium est, ut ex Ætnâ Vulcanoque**

2. *datur intellegi.* Atque hoc quidem fatis * *παχυλῶς*: cùm & aliter constet, Terræ passim mixtos genitabiles quosdam & vitales ignes. Vides opiniones duas: siue Ignem esse hanc Deam, sed sensu vario; siue Terram ipsam. & pro hac etiam Euripides:

Καὶ Γαῖα μήτηρ, Ἐσίδω δ' ὁ σ' ἔφασκε

Βροτῶν καλοῦσιν, ἡ μένλω ἐν αἰθέρι:

*Et Terra mater, Vestæ quæ sapientibus
Agnominaris, ipso in aëre & sedes.*

Itaque magistri Græci deriuant Ἐσίδω τῷ τὸ ἔσασ, ὃ ἐστὶν ἰδρύσασθαι ἢ τῷ τὸ ἔσαναι, ὃ ἐστὶν ἐν ἐνὶ τῷ ἰδρύσθαι. Sunt qui *Statam matrem* (in Festo) hanc eandem opinentur: sed opinentur.

NOTÆ.

NOTÆ.

1. Vestam ipsam passim Terram.] *Et à similitudine, quia Mensa nos alit, itemq. rotunda est, sicut Terra, notat Plutarchus Mensam ipsam quibusdam Vestæ nomine dictam. In Symposiac. VII. cap. IV. Εμοὶ δὲ, εἶπεν, ἐδόκει καὶ μίμημα τῆ γῆς ἡ ξαπώζα εἶναι. πρὸς γὰρ τὸ ἔρεσεν ἡμᾶς, καὶ μόνιμός ἐστι, καὶ χαλῶς ὑπὸ ἐρίῳ Ἑστία καλεῖται :* Mihi videtur & Terræ simulacrum Vesta esse. Nam & alit nos, & stabilis præterea manet : eoq. à quibusdam benè Vesta appellatur. *Causam deinde & hanc dat prisca moris siue religionis, ne Mensa vacua relinquatur: nam nec Terram sic esse volumus aut optamus.*

2. Medium Pythagorici esse Ignem arbitrantur.] *Addendus Aristoteles I I. De Cælo, cap. XIII. qui eadem diffusè : & utri- que illustrando Philolai Pythagorici ipsa verba, in Stobæi Physicis Eclogis. Eorum summa : Duplicem Ignem esse: Supremum illum, qui circumplectitur; Medium, qui naturâ antiquior est, & centri locum tenet. quem vocari dicit τὸ παντὸς Ἑστίαν, Vestam siue Larem & focum Vniuersi; itemq. Διὸς οἶκον, μητέρα θεῶν, βασιλὴν καὶ συνορχήν φύσεως, Iouis domum, Deorum matrem, Basim & sustentaculum Naturæ. Circa hunc decem corpora ferri & volui, Cælum, Planetas, Solem, Lunam, Terram, iterumq. Terram oppositam, & deinde hūc Ignem Ἑστίας τάξιν ἔχοντα, Vestæ aut Foci locum tenentem. Mira sententia, & parum adhuc nobilis. At de Igne Vestæ, etiam Numi. Ut iste.*

Faustinae Pij. Æ.



CAPVT II.

*Quibusdam & Venerem dici. Sed Vestam, pro Igne
sive Foco, antiquitus & passim cultam: & à quo
exemplo Roma.*

ISTA igitur Vesta est. nam Augustini traditio, vt fidem
habeat, vix exempla, *Vestam etiam Venerem dici*. Ita
enim ille: *Quis ferat, quòd cùm tantum honoris & quasi
castitatis Igni tribuerint, aliquando Vestam non erube-
scunt etiam Venerem dicere?* An quia Ignis est, & tale
Venus? an quia (vt Macrobius scripsit) *Physici terra supe-
rius hemisphærium, cuius partem incolimus, Veneris ap-
pellatione coluerunt: inferius verò Proserpina?* Sed hæc
longinqua, aut aliena: magis illud Apollodori, *vnam è
quattuor Hesperidibus Vestam esse*. Nihil ad nostrâ. quæ
Græcis Latinisque culta, inter præcipua numina, fuit: at-
que adeò¹ inter duodecim illa prima. Pausanias, de sacri-
ficiis quæ sollemniter in Olympiâ fiunt: *Θύειν δὲ ἑστία μὲν
πρώτῃ, δεύτερῃ δὲ τῷ Ὀλυμπίῳ Διὶ: Sacrificant Vesta primùm,
tum secundo loco Ioui Olympio*. Phurnuti nota huc facit:
*Vesta, inquit, prima & postrema nata perhibetur, quòd
in hanc (id est Terram) resoluantur quæ ab eâ producun-
tur, & ab eâdem constituuntur. Quare & Græci ab illâ
sacrificiorum principium sumpserunt, & in illam postre-
mò desinebant*. Tradit & Seruius, *Nullum sacrificium
sine figne esse, Vestamq; in omnibus inuocari*. Ad princi-
pium, alludere aliquid Ouidij illud videatur:

— inde precando

Dicimus, ô Vesta quæ loca prima tenes.

Et si

De Ciuit.
lib. i v.
cap. x.

1. Saturn.
cap. xxi.

12. Bibl.

I.
Lib. v.

Et si ipse ad vestibulum, vbi olim Focus, refert. De postremo autem loco, sic & Cicero: *Vis autem Vestæ ad aras & focos pertinet. itaque in eâ Deâ, quæ est custos rerum intimarum, omnis & precatio & sacrificatio extrema est.* Virgilius seruauit:

11. De
Nat. deor.

1. Georg.

Dij patrij indigetes, & Romule, Vestæq; mater.

Velleius: *Iupiter Capitoline, Gradine Mars, perpetuorumq; custos Vestæ ignium, vos publicâ voce obtestor.* Et alius alia exempla obseruet. Sed ad Romanam propriè Vestam vt veniamus (id institui:) vnde ei exemplum, & quando origo? Exemplum à Troianis, atque vnâ cum Æneâ in Italiam venit. Nam primitus culta in Ilio, extulitque Æneas. Virgilius:

Sic ait, & manibus vittas Vestæq; potentem,

Æternumq; adytis effert penetralibus Ignem.

Elatam Lauinij constituit, conditâ à se vrbe, & sede regni. Inde in Albam Longam transtulit Ascanius: & denique ab vrbe eâ matrice coloni Romam. Hoc est, quod Augustinus tetigit: *Sacra illa fatalia (Vestæ) quæ iam tres, in quibus fuerant, presserunt ciuitates.* Tres iam dictas, mali nempe fati, nec diuturnas. Prudentius ambiguè, vel ad Troiam, vel Athenas, refert:

111. De
Ciuit. cap.
xviii.

11. aduer.
Symmach.

— *in his quoniam Vestalis origo fauilla*

Urbibus, vt memorant, primo de fomite sumpta est:

Sacrauitq; focos aut Phryx, aut Graius, alumnos.

Et Athenis quidem Ignem cultum, mox dicam: sed propior tamen certiorque origo à Troianis, & Albâ: imò mansit sacrum Albæ, etiamsi Roma iam accepisset. Notandum est. & Iuuenalis ita intellegendus:

Ignem Troianum, & Vestam colit Alba minorem.

Scho-

Scholiaſtes ibi vetus : *Romanos Tullo rege mouere ea ſacra, & transferre voluiſſe : ſed magnam lapidationem de celo factam. Et iuſſi, inquit, ex libris Sibyllinis Pontifices ex Sc. ſacra Albæ renouare inde ibi perſeueranti deo. & Veſtam minorem dixit, ad compoſitionem.* Ecce, Tullo rege, notum Albam dirutam, & ciues Romam traductos : tamen ſacra illa Veſtæ ait Scholiaſtes manſiſſe, monitu diuino, & lapidatione territòs amouere. Addit & de *libris Sibyllinis* : quos refert ſcilicet ad Tulli æuum, non Tarquinij Superbi, vt plures. Sed cum Scholiaſte etiam Varro facit. Additque, *perſeueraffe.* quod clarius in eo meliusque ſcribas : *renouare. Inde ibi perſeuerant. ideò & Veſtam.* Sanè perſeuerarunt, etiam Symmachi æuo. atque ille in epiſtolâ quadam : *Inceſtum Primogenia, apud Albam Veſtalis antiſtitis.* iterumque in epiſtolâ ſequenti. Igitur etſi Romam inde traducta, non tamen Albæ ſacra eſſe deſierunt. Sed quando traducta? Plutarchus ambigit : & *Fama eſt, inquit, Romulum etiam Ignem ſacrum inſtituiſſe, & Virgines legiſſe, quas Veſtales vocant : ſed alij tribuunt hoc Numæ.* Propertius quidem palàm Romulo, de Tarpeîâ, quam facit ſacerdotem Veſtæ :

Lib. ix.
epiſt. cxx.

In Romulo.

Lib. iv.
Eleg. xv.

*Et ſatis vna mala potuit mors eſſe puella,
Quæ voluit flammas fallere Veſta tuas?*

& paſſim, totâ Elegiâ. Sed Dionyſius abit, atque adeò reſellit, aitque : *Romulum dumtaxat focos ſingulis curiis conſtituiſſe, nullum Veſtæ publicum; memorem dedecoris, quod mater in Dea eius ſacerdotio ſubiſſet. Argumentum huic rei certum, quòd Veſta ades ſita ſit extra Romam quadratam, quam Romulus condidit : non futurum,*

Lib. i. r.

rum, si ille auctor. Nam publicum, inquit, focum solent omnes in præcipuâ urbis parte collocare. Tamen & Cicero in priorem ire videatur: *Quod sacrificium tam ve-* ^{De Ha-}
tus est, quàm hoc (Vestaliū) quod à regibus æquale huic ^{tusp. resp.}
urbi accepimus. Si æquale, ergo à Romulo. Sed tamen communior fama ad Numam refert. de quo Liuius: *Vir-*
gines Vestæ legit, Albâ oriundum sacerdotium, & genti
conditoris (ob Iliam scilicet) haud alienum. Idem Dionysius, Plutarchus, alij.

NOTÆ.

- i. Inter duodecim illa prima.] *Ennij versus in Apuleio:*
 Iuno, Vesta, Minerua, Ceres, Diana, Venus, Mars,
 Mercurius, Iouis, Neptunus, Vulcanus, Apollo.

CAPVT III.

Numam templum sacrasse, atque id rotundum: vi-
ris noctu interdictum. Nulla ibi statua: & tamen
vulgò eius imago.

ATQUE adeò Templum Vestæ instituit, & quidquid ad certum & sollemnem eius cultum. Id fuit situm inter Capitolium & Palatium, medio ferè spatio: discretè Dionysio scriptum, & extra Romulæam urbem, quæ radicibus Palatij ferè terminabatur. Indicat & Liuius: *In Nouâ viâ, ubi nunc sacellum est, supra adem Vestæ.* Nam via hæc Noua ex Palatij parte, iuncta Romano foro: & in Fori parte ipsa ædes. Condidit Numa anno Urbis quadragesimo, id est regni sui secundo. quod Ouidius ita notat:

v. Fastor.

B Dena

*Dena quater memorant habuisse Palilia Romam,
Cum flammæ custos urbe recepta Dea est.*

*Regis opus placidi, quo non metuentius ullum
Numinis ingenium terra Sabina tulit.*

Ostendit deinde olim vile, nunc ære & marmore nituisse.
Ære, in tecto: sed, ut opinor, aurato.

*Quæ nunc ære nitent, stipulâ tum tecta virebant,
Et paries lento vimine textus erat.*

1. Addit, ¹ rotundam olim & tunc fuisse:

Forma tamen templi, quæ nunc manet, antè fuisse

Dicitur: & formæ causâ probanda subest.

Causam addit plusculis versibus, quia Vesta Terram notat, Terra autem rotunda. Quod ipsum in Festo: *Rotundam ad eam Vestæ Numa rex consecrasset videtur, quod eamdem esse terram, quâ vita hominum sustineretur, crediderit, eamque in pilæ formam esse, ut simili templo Dea coleretur.* Seruius amplius, nescio an verè, suggerit, *Ædem hanc potius quàm Templum fuisse, neque inauguratum à Numâ, ne Senatus ibi haberi posset.* Et si tamen nefas non fuit viros intrare, sed penetrare. Dionysius indicat: qui scribit, *de die patuisse OMNIBVS, at PERNOCTARE fas fuisse nemini masculo.* Docet & Neronis factum (in Tacito) qui *super profectioe suâ veneraturus deos, adiit Capitolium, & Vestæ quoque templum iniuit.* Sed & Piso (apud eundem) *peruasit in ad eam Vestæ.* Viri igitur intrabant, sed non pernoctabant, neque ad intima, ut dixi, penetrabant. Ideò Metellus Pontifex, sacra ab igne erepturus, apud Ovidium profatur:

Sacra vir intrabo, non adeunda viro.

nempe illa penetralia, & quò solæ Virgines ibant. In hac
autem

autem æde negant simulacrum vllum fuisse. Ovidius:

*Esse diu stultus Veste simulacra putavi,
Mox didici curuo nulla subesse tholo.*

Simile in Græciâ. Pausanias: Παρελθούσι δὲ εἰς τὸ τῷ Ἑστίας, In Corint.
ἄγαλμα μὴ εἶναι οὐδὲν, βωμὸς δὲ, καὶ ἐπ' αὐτῷ θύουσι: Progre-
dientibus in Veste, simulacrum nullum occurrit, Ara
tantum, & in eâ Veste sacrificant. Caussam Fastorum
ille conditor reddit:

*Ignis inextinctus templo calatur in illo,
Effigiem nullam Vesta nec Ignis habent.*

Quæ ut ita sint, tamen Vestæ imago passim in Nummis
aut Statuis expressa; hodieque exstat. Plinius² sedentem 2.
effingi solitam ostendit, à stabilitate: sed Nummi hoc
amplius, & sedentem exprimunt, & alterâ manu facem,
alterâ discum siue pateram libatoriam præferentem: cum
inscriptione, VESTA. P. R. QVIRITIVM. De Face, ad
ignem pertinet: de Disco, ad sacrificia sollenniter & per-
petim oblata. Suidas Tympanum ei tribuit: nescio an in
veteribus spectionibus observatum. Γῆς ἄγαλμα, inquit.
Ἵνα ἃ καὶ πλάτῃσι τὴν Ἑστίαν, οἷον εἰ τὴν γῆν τύμπανον βασάζουσιν,
ἐπεὶ δὴ τοὺς ἀνέμους ἡ γῆ ὑφ' ἑαυτῇ συγκλείει: Terræ effigies.
mulierem formant Vestam, tamquam Terram, Tym-
panum præferentem: quoniam ventos terra intra se con-
cludit.

NOTÆ.

1. Rotundam olim & nunc fuisse.] *Docent Nummi, ut isti, atque alij plures.*



2. Sedentem effingi solitam.] *Crebrò. sed etiam stantem: et figuras aliquot è Nummis vide.*



CAPVT IIII.

Aliud ab Augusto Vesta templum. item de Regiâ, & Atrio Vestæ.

ATQVE hoc Vestæ igitur templum: éstne aliud? aliud, Falsum, & Verum. Falsum, quod antiquarij hodie adtribuunt, ad Tiberim, iuxta Forum Piscarium, sub Auentino. Ædícula exstat, formâ rotundâ, & extra murum interiorem columellę xviii. velut porticum formant. Quia rotunda, quia extra pomœrium Romuli, faciunt veterem illam Numæ esse. Falli arbitror. nec asseritor huic opinioni, in isto quidem loco, erit: & quis nescit aliorum quoque Deorum templa sæpè eâ formâ fuisse? Quod autem extra Romuli pomœrium: valdè quidem. etiam extra Numæ: sed antè docuimus, hanc veram à nobis descriptam, item extra finitionem illam fuisse. Ergo hæc valeat: altera est vera, & à me eruenda, in Palatio collocanda. Ouidius in extremâ Metamorphosi palàm de eâ:

*Vestâq; Casareos inter sacra penates,
Et cum Casareâ tu Phœbe domestice Vestâ.*

Viden' duo numina in Palatio dicata, Vestam & Apollinem? Quod idem poëta clariùs etiam, in Fastis:

*Aufert Vesta diem. cognati Vesta recepta est
Limine: sic iusti constituere patres.*

Phœbus habet partem, Vesta pars altera cecit:

Quod superest illis, tertius ipse tenet.

Diem quartum Kalendarum Maij, inquit, *Vesta aufert.*

Quare? sùntne tunc Vestalia? non illa prisca quidem,

Lib. xv.
extremo.

Lib. VI.

quæ incidunt in quintum Idus Iunij, ipso Ouidio attestante, & marmoreis Fastis. Nam in his hodie insculptum eo die legitur, VEST. NE. PR. quod significat, VESTALIA. NEFAS PRÆTORI. Prior autem ille dies iisdem Fastis in Aprili non signatur: quia nouellus, & dedicationis modò index. Nam Augustus, cùm omnino in Palatio habitare vellet, & mos tamen ac cerimonia haberet Pontificem Max. in domo publicâ, iuxta Vestæ, habitare: ipse Vestam potiùs ad se transtulit, & Sc. partem domus suæ publicauit, atque alteram illi consecrauit. Ouidius notat, Patres ita censuisse: qui scilicet proni tunc valdè in Principum desideria siue affectus. Et poëta quidem clarissimè: sed & in aliis scriptoribus sunt quæ eò ducant.

Lib. LIV.

Dio scribit: Επειδή τε ὁ Λεπίδης μεταλλάξαντος ἀρχιερέως ἀπεδείχθη, ἔτ' οἰκίδῳ πινὰ δημοσίῳ ἐλάβεν, ἀλλὰ μέρῳ πτ' ἑαυτοῦ, ὅππῃ τὴν ἀρχιερέα ἐν κοινῷ πάντως οἰκεῖν ἐχρῆν, ἐδημοσίωσε: *Postquam Lepido mortuo Pontifex Max. designatus est (Augustus) nullam domum publicam accepit, sed partem suæ, quoniam omnino Pontificem in publico habitare oportebat, publicauit.* Imò non partem tantùm, sed mox totam.

Lib. LV.

Ita enim idem scriptor: Οἱ δ' Αὐγύστης τὴν οἰκίδῳ οἰκοδομήσας, ἐδημοσίωσε πᾶσαν, εἴτε διὰ τὴν σωτέλῃ τὴν ᾧ ἔα ὁ δῆμος οἱ ἡγορεύοντες, εἴτε ὅππῃ ἀρχιερέως ἦν, ἵν' ἐν τῇς ἰδίῳις ἀμα καὶ τοῖς κοινοῖς οἰκοῖν: *Augustus domum cùm exadificasset, totam publicauit: siue quia collato ære à populo struxerat, siue quia Pontifex Max. cùm esset, ut in propriis simul ἔς publicis adibus habitaret.* Secunda causâ verissima est. Suetonius, de Iulio Cæsare: *Habituauit primò in Suburrâ, post autem Pontificatum max. in Sacrà viâ, domo publicâ.*

Cap. XLV.

Agnoscisne Domum publicam in Pontifice? & quidem

Sacrà

Sacrâ viâ, non procul à Vestâ? Etsi Regis Sacrificuli domus fuisse etiam videtur propior, quam ipsam Vestalibus Augustus dono dedit. Ita enim Dio ibidem narrat, & subdit: Τῷ μὲν ἑ βασιλέως τῶν ἱερῶν (ita hæc legenda) Lib. LIV.
 ταῖς ἀειπαρθένοις ἔδωκεν, ἐπεὶ ὁμοῖα καὶ ταῖς οἰκίσεις αὐτῶν ἦν:
Et tamen illam domum, quæ Regis sacrorum erat, Virginitibus Vestæ dono dedit; quoniam adibus earum CONTIGVA hærebat. De quâ domo Regis, in Festo aliquid legas, *Viâ Sacrâ*, & inibi fuisse. An quia ipsam *Regiam*, exemplo Numæ, incoluit: an quia in vicino? De Regiâ quidem, Ovidius:

Hic locus est Vestæ, qui Pallada servat, & ignem:

Hic fuit antiqui regia PARVA Numæ.

Meminit Cicero: *Nuper quidem ad Regiam me panè* Pro Mil.
confecit. Horatius:

Vidimus flauum Tiberim, retortis

Littore Etrusco violenter undis,

Ire deiectum monumenta Regis

Templaq; Vestæ.

Ibi Scholiastes: *Regiam dicit Numæ Pompilij, qui ad Vestæ suam habuit Regiam.* P. Victor, in descriptione Urbis: *Regia Numæ, & Templum Vestæ.* Ibidem & *Atrium Vestæ*; quod Regiæ huic adiunctum. etsi Ovidius confundere videatur:

Hic locus exiguus, qui sustinet atria Vestæ,

Tunc erat intonsi regia magna Numæ.

Nempe & ille locus pars Regiæ erat: non ipsa illa tota. Hoc Atrium Virginum habitationi seruiebat, vt Regia propriè dicta Pontificum. Agellius: *Virgo Vestalis simul est capta, & in atrium Vestæ deducta:* sicut nupta in Lib. I.
cap. XII.
 domum.

domum. Plinius: *Virgines cùm vi morbi Atrio Vestæ coguntur excedere, matronarum curæ custodiæq; mandantur.* Obserua igitur illic egisse: sed vi morbi exisse, quia locus scilicet parum laxus, nec ægrorum curæ. Et si maior tamen, iam ab Augusto, Regiâ etiam, vt dixi, iis concessâ: sed neque sic amplius.

CAPVT V.

Vestales sacerdotes, Virgines castas. quo auro? quo numero?

SATIS de ipsâ Deâ, & templo: de ministerio alioque Scius cultu videamus. Ministræ Vestales fuere, atque ex Virgines. In Ouidio duplex causâ. Prior, quòd Iuno & Ceres, sorores Vestæ,

Utraque nupserunt: ambæ peperisse feruntur:

Restitit impatiens de tribus una viri.

nempe hæc Vesta. Ergo,

Quid mirum, virgo si virgine leta ministrâ,

Admittit castas in sua sacra manus?

Alterâ causâ, quòd Vesta Ignis, qui nihil gignit,

Natâq; de flammâ corpora nulla vides.

Iure igitur virgo est, quæ semina nulla remittit,

Nec capit: & comites virginitatis amat.

Cicero & duas alias dedit: *Vestæ colendæ*, inquit, *virgines præsumunt, vt aduigiletur facilius ad custodiam ignis: & sentiant mulieres, in naturâ feminarum omnem castitatem peti.* Aduigilent facilius. quare? quia liberæ à viro, prole, aliis curis. Castitatem peti. quomodo? cùm virgines placere Diis vident, ipsæ, pro parte suâ quæque,
sint

sint castæ. Alij libri, *pai* habent, non *peti*. Tum mallet, *mulieres, naturam*. Potest & ab exemplo esse. nam Plutarchus scribit, *in Graciâ quoque, ut Athenis & Delphis, & sicubi seruatur æternus ignis, præesse si non Virgines, tamen Viduas & à viro castas*. Eius ergo Romæ obtinuit, ut parvæ & tenerâ ætate caperentur, certæ pudicitia, & vitij expertes. Labeo Antistius scripsit, *minorem quàm annos sex, maiorem quàm annos decem natam, capi fas non esse*. Prudentius aspicit:

I I. contra
Sym.

*Ac primùm parvæ teneris capiuntur in annis,
Antè voluntatis propriæ quàm libera secta
Justa maritandi condemnet vincula sexus.*

Et Augustus, apud Suetonium: *Cùm in demortuæ Vestalis locum aliam capi oporteret, ambirent quæ multi ne filias in sortem darent; adiuravit, si cuiusquam neptium suarum ætas competeret, oblaturum se fuisse eam*. De ætate, palàm vides: & hoc quoque, ægrè parentes in hanc velut custodiam, & adactam virginitatem, suas dedisse. Et si multæ tamen non erant, nec crebræ istæ lectiones. Nam Numa in vniuersum quattuor eas instituit, cepitque: *Geganiam, Veraniam, Canuleiam, Tarpeiam*: vti nomina hæc à Plutarcho produntur. Duas deinde alias Seruius Tullius addidit, ut Plutarchus; siue ante eum potius Tarquinius Priscus, ut Dionysius adserit. & addit, *ad suam ætatem eum numerum sic mansisse*. Quò fortasse Valerius respexit, cùm de hoc Tarquinio: *Dilatauit imperij fines, cultum deorum novis sacerdotiis auxit*. Neque enim legere memini, de aliis ab eo sacerdotibus institutis. Ceterum de numero isto, etiam Festus: *Sex Vestæ sacerdotes constitutæ sunt, ut populus pro suâ quisque*

C

parte

Epist. 11.
contra
Sym.

1.

2.

parte haberet ministram sacrorum : quia ciuitas Romana in sex est distributa partes , in primos secundosq^{ue} Titien-
ses, Ramnes, Luceres. Vnus Ambrosius aliter, qui septem
eas facit. Quot tamen illis Virgines premia promissa fe-
cerunt? (puto, ferunt, legendum) vix septem Vestales
capiuntur puellæ. An tamen¹ non sex potius ibi rescriben-
dum? ² an Augustum, qui pleraque sacerdotia numero,
etiam Vestale hoc censemus auxisse? Aliud quod suspi-
cer non habeo. nam quod quidam prætendunt aut ex-
cusant, *Vestalem maximam* extra senarium illum nume-
rū fuisse, ab Ambrosio autem includi : quis dicit? aut que
ratio est? Quin vel maximè ea Vestalis, & in ministerio
sacrorum solâ ætate antecedens.

NOTÆ.

1. Non sex potius ibi rescribendum.] Dubito, nec temerè fe-
cerim. nam & Ambrosius voculam vix addidit, quasi negantē, certè mi-
nuentem. Sunt etiam Nummi Faustina Augustæ, quæ Uxor M. An-
tonino Philosopho fuit : in quibus sex sacrificantes Virgines ad aram, &
vna paruula septima. quam suspicantur discipulam esse, & nondum le-
gitimam sacerdotem : ideoque scitè & cautè Ambrosium dixisse, Vix
septem. At ecce sunt, qui Puerū hunc faciunt, & sacrorū camillum.
& sanè difficile; certò ex Nummis arbitrari. Etiam C. Antonius Hop-
perus, magni illius Præsidis filius, antiquitatum harum peritus, addubi-
tabat an Vestales essent, ob templi formam : quæ non rotunda, sed an-
gularis conspicitur. aliter, quàm in reliquis de Vestâ Nummis. Sed &
alii exstant Lucillæ inscripti, sub id eui, vbi sex tantum Virgines com-
parent, nullâ illâ minore adstante. Itaque iterum ad incertum redigimur
sed Nummi sunt isti. vide.

Faustina. Æ.



Lucilla. Æ.



2. An Augustum.] Neque id sedere omnino potest. cum Plutarchus, post sex enumeratas, addat: Καὶ διατηρῆσαι μέχρι χρόνων τοῦτων τὸ πλῆθος: & seruasse, vsque ad sua tempora, eum numerum. Si ad sua, id est Traiani, quomodo Augustus auxerit?

CAPVT VI.

Alia in capiendō spectata, seruataque. Sortem, aut Oblationem, interuenisse.

QVOT captae fuerint, vidimus: nunc & Modum capiendi collustremus. Hoc enim verbo sollenniter utebantur: caussamq; dat Agellius: *Capi virgo propter eā dici videtur, quia Pontificis maximi manu prehensa, ab eo parente, in cuius potestate est, veluti bello capta abducitur.* Cepit primas ipse Numa: & vt Dionysius ait, *ius deinceps capiendi voluit apud Reges esse.* At pulsus Regibus, Pontifex maximus in locum venit: sed non libera prorsus electione, legibusque suis adstricta. E quibus *Papia* fuit (in Agellio) *quā cauetur, uti Pontificis* ^{Lib. I. cap. XII.} *maximi arbitrato, virgines e populo viginti legantur: sortitiōque in concione ex eo numero fiat: & cuius virginis ducta erit, ut eam Pontifex max. capiat, eaq; Vesta fiat.* Ait primum, *Pontificis arbitrato legi.* quo sensu? nempe

vt ius probandi reiiciendique ipse habeat, & sitne idonea diiudicandi. Nam non Ætatem solum, sed Genus, Corpus, quæque adhærent, inspicere solent, & vt omnia apta honestaque ministerio essent. In Genere quidem, ne, *cuius parentes, alter ambobus servitutem seruissent: aut in negotiis sordidis diuersantur.* Item excusari, *cuius pater Flamen, Augur, Quindecimuir, aut Septemuir, aut Salius est:* & talia minuta, quæ in Agellio legas. In Corpore, *ne lingua debili, sensuue aurium diminuta, aliave quæ corporis labe insignita sit.* Quæ adhærent: *vt patrima sit & matrima, vt ne emancipata sit:* & talia, dicto loco videnda. Sequebatur in lege, *Virgines viginti.* Magno satis numero, ad vnam dumtaxat capiendam: sed caussa est, vt fors leuior accidat, sparsa sic per plures. Addit, *E populo.* Toto, inquam, populo, non è patriciis tantum, sed & plebeiis. Imò verò Augusti æuo, præter legem moremque veterem, etiam ex libertinis captæ. Dio Cassius: *Εἰς τὴν ἐραδίαν οἱ πᾶν ἐν ἡμεῖς τὰς θυγατέρας εἰς τὴν τ' Εἰσίας ἐργεσίῳ ἐπέδιδον, ἐνομοθετήθη καὶ ἡ ἀπελευθέρων γεγνημένας ἐπαῖται:* *Quoniam haud promptè ij qui planè nobiles erant, filias suas ad Vestale sacerdotium darent, Lege statutum est etiam è libertinis natas posse capi.* Sequitur, *Sortitionem in concione fieri.* In concione, comitiis, puto, Curiatis: vt coram testibus res fieret, & dignitas sortitio ad cresceret dignitate actionis. Sortitio autem adhibita, vt quasi diuinitus legi excerptique è pluribus talis videretur. Facit huc Suetonij illud suprà, *Ambirent quæ multi ne filias in sortem darent.* Tangit & Sortem Dio, post superiora illa verba, additque; *cum sortitio facta esset, Libertinam nullam tunc ductam.* Nec tamen semper ad

Sortem

Sortem ventum : Oblatio locum habebat, & talis (si apta) præferebatur. In Agellio : *Siquis honesto loco natus adeat Pontificem maximum, atque OFFERAT ad sacerdotium filiam suam, gratia Papiæ legis per Senatum fit.* Omittitur scilicet, Sc. interueniente, sortitio. Vox Augusti huc spectabat, *Si neptium suarum competeret ætas, OBLATVRVM se fuisse eam.* Taciti item narratio : *Rettulit Cæsar (tamquam Pont. maximus) capiendam Virginem in locum Occiæ: egit q̃ grates Fonteio Agrippæ, & Domitio Pollioni, quod OFFERENDO filias, de officio in rempublicam certarent.* Addit deinde in ipsâ oblatione electionem & arbitrium : & *prælatam Pollionis filiam, non ob aliud, quàm quod mater eius in eodem coniugio maneret : id est, vniuira esset. quæ ipsa species aliqua castitatis.* Habet deinde lex, *Eam Pontifex max. capiat.* Atque ipsa verba sollennia, ex libro primo Fabij Pictoris, recenset illustris Noctium scriptor : SACERDOTEM. VESTALEM. QVÆ. SACRA. FACIAT. QVÆ. IOVS. SIET. SACERDOTEM. VESTALEM. FACERE. PRO. POPLO. ROMANO. QVIRITIBVS. VTI. Q. QVÆ. OPTVMA. LEGE. FOVIT. ITA. TE. AMATA. CAPIO. Adiicit Agellius : *AMATA inter capiendum à Pontifice max. appellatur, quoniam quæ prima capta est, hoc fuisse nomine traditum est.* Sed ubi prima capta ? Si Romæ, & à Numâ : Plutarchus redarguit, qui quattuor nominat, nec vllam inter eas *Amatam.* Sin Albæ, aut Lauinij; hoc nescio, & in medio relinquo.

CAPVT VII.

Disciplina captarum: gradatio & adscensus: tempora ministerij: & Virgo Maxima.

SED iam igitur captæ, & sic puellæ ac teneræ: quid deinde? Disciplina sequitur, & quomodo ad ministeria sua factæ. Deducebantur in Atrium Vestæ, atque ibi à senioribus ad ritus & cerimonias omnes (plurculæ erant) instructæ. Nam in tres velut classes, etsi paruius hic numerus, diuidebantur: Discientium, Exercentium, Docentiumque. Seneca, De Vitâ Beatâ: *Virginum Vestalium more, quæ annis inter officia diuisis, discunt facere sacra, & cùm didicerint, docent.* Dionysius etiam distinctiùs: *Tempus tricennale manere eas oportet, castas & à nuptiis vacuas, sacra ex more facientes. quo tempore decem annos discere debent, decem sacris operari, decem docere.* Pulchra diuisio: & eadem alibi in Plutarcho. Itaque non nisi xxx. annos obligabantur, & post id tempus licitum nubere, haud pessimâ adhuc ætate. Nam pone ab anno vii. (id licebat) ingressam: ergo anno xxxvii. fas virum quærere, & ætate etiam frui. Ambrosius hoc irridet: *Qualis est ista non morum pudicitia, sed annorum? quæ non perpetuitate, sed ætate præscribitur?* Ergo & interdum nubebant. vt illa in Prudentio:

*An seni
ger. sit Resp.*

Nubit anus veterana, sacro perfuncta labore.

etsi antiquitus obseruatum, infauistas ferè & parum lactabiles eas nuptias fuisse. Sed, vt dixi, non nisi triginta annis obligabantur: antè autem nefas excedere. Ideò Symmachus, vt Pontifex, Vestalem quamdam increpat: *Diceris*

*Lib. ix.
epist. cxi.*

ante

ante annos legibus definitos Vestali secreto velle decedere; nondum credo rumori, sed assertionem tuæ vocis exspecto. Hoc illam tunc sub Christianis Principibus ausam opinandum est, nostrę religionis zelo siue velo: sed olim silendum manendumque, aut in mundo pœna erat. An eadem autem annorum terminatio Albæ, vnde oriundum hoc sacerdotium? Dionysius abnuat, si verba eius germana, de Iliâ: Πενταετὺς δὲ οὐκ ἐλάττω χρόνον ἔδει ἀγνὰς Lib. i. διαμῆναι γάμων: *Quinquennio autem, nec minus, oportebat à nuptiis castas manere.* Itane quinquennio tantum? vanitas: imò πεντηκονταετὺς, *quinquaginta annos*, in Dionysio legendum, vt lex Albana paullo durior Romanâ etiam fuerit, quod Liuius subindicat, qui tradit de hac ipsâ Iliâ, *perpetuâ virginitate spem partus ei ademptam:* & item Zonaras, qui, παρθένον διὰ βίου, *virginem perpetuam* dicit. Consideretur, ego obseruo, plerasque ad ultimam ætatem in sacerdotio perseuerasse: & exemplum in Tacito, de Occiâ: quam scribit, *septem & quinquaginta per annos, summâ sanctimoniâ, sacris Vestalibus præsedisse.* Ergo xx. circiter annos mansit, ultra suum tempus. Quod *Præsedisse* ait, non traho ad dignitatem, & quasi *Maxima* fuerit (vix anni illi admittant:) sed omnes *Præsidere* sacris, itemque *Antistites* vel *Antistite* dicuntur. Liuius apertè, de omnibus: *vt assidue templi antistites essent.* & Symmachus: *Primogeniæ dudum apud* Lib. ix. *Albam Vestalis antistitis.* Et si ordo tamen inter eas fuit, sed ministerij & ætatis. Vna enim quæ vetustissima, *Maxima* dicebatur. Ad ætatem, inquam, id referendum. atque ita Ouidius:

Ignem cremat vitulos, quæ NATV MAXIMA virgo est.

Sueto-

Cap. LXXX. Suetonius, Iulio: *Testamentum eius demandatum vir-*
 III.
 Cap. VII. *gini Vestali Maximæ. Idem, in Domitiano: Damna-*
 tam ab eo *Corneliam virginem Maximam: quæ malè*
 Lib. IV. in Plinij epistolis, *Cornelia Maximilla. In lapidibus sæ-*
 Epist. XI. pe: V. V. MAXIMÆ. quod est, *Virgini Vestali Max.*
 Lib. LIV. Quæ ipsa Dioni ἡ πρῶτος ῥόσος: & Tacito, *Vestaliū ve-*
 XI. Annal. *tustissima* nominatur.

CAPVT IIX.

*Munera earum, primūque tutela Ignis. Perpetuum
 hunc fuisse: si desuisset, pœna Virginum & flagra:
 iterūque instauratio.*

NVMERVM, *Capturam, Disciplinam, Ordinem, ha-*
 bemus: ad *Munia* earum trāseamus. Neque enim
 vacuæ vmquam aut feriatae habitæ: sed plures frequen-
 tesque operæ, & mireris tam paucas suffecisse. Tria præ-
 cipua, in quibus deditæ: *Vigilare, Adseruare, Sacrifica-*
 re. Vigilia ad Ignem spectauit, quem sine intermissio-
 ne ali opus, & reparari. Itaque *Æternum* siue *Sempiter-*
 num dicebant. Cicero: *Virginesq; Vestales in Vrbe custo-*
 diunto ignem foci publici SEMPITERNVM. Silius:

II. De Le-
 gib.

*Et vos Virgineâ LVCENTES SEMPER in arâ
 Laomedontæ Troiana altaria flammæ.*

Florus, de Numâ: *In primis focum Vestæ virginibus co-*
 lendum dedit, ut ad simulacrum celestium siderum custos
 imperij flamma vigilaret. Vult, sicut sidera æternū lu-
 cent, sic debere, virginum assiduâ curâ atque operâ, hunc
 Ignem. Atque ita erat. Nam ignis σβέσω (ait Dionysius)
 ὑπὲρ ἅπαντα τὰ δεινὰ Ῥωμαῖοι δεδόκασι, ἀφ᾽ ἡμισμοῦ τῆς πό-

λεως σημεῖον ὑπολαμβάνοντες, ἀφ' ἧς ποτ' αὖ αἰτίας γρήται:

Exstinctionem, super omnia grauiā & timenda, Romani timent: interitus aut imminutionis Reipublicæ id signum interpretantes, à quacumque tandem causā euenerit.

Liuius cum eo: Plus omnibus aut nunciatis peregrè, aut Lib. xx-
visis domi prodigiis, terruit animos hominum ignis in ade VII.

Vestæ exstinctus. Et miseras Virgines, si euenisset. Nam ignis Vestæ (ait Festus) si quando interstinctus esset, verberibus afficiebantur à Pontifice. Sed pudore virgineo tamen saluo, in loco obscuro, & velo medio interposito, vti

Plutarchus notauit. Exemplā autem huius castigationis in historiā. vt Valerio: P. Licinio Pontifici maximo vir-

go Vestalis, quia quādam nocte parum diligens ignis ateri- Lib. i.
ni custos fuisset, digna visa est quæ flagro admoneretur. cap. i.

In Liuiō: Ignis in ade Vestæ est exstinctus, casaq; flagro Lib. xx-
Vestalis, cui custodia noctis eius fuerat. Nota de Flagro VII.

vtrobique: quæ seruilis castigatio. nota etiam de custodiā eius noctis, vt per vices iuisse videatur, & singulæ suis no-

ctibus dumtaxat excubasse. Quod si autem exstinctus;

sua & certa ratio accendendi iterum erat: quam Diony-

fius alibi se dixisse profitetur: sed nempe in libris, quos fatum inuidit. Est ea tamen in Festo: &, Mos erat, inquit,

tabulam felicitatis materiae tamdiu terebrare, quousque excep-

ptum ignem cribro aneo Virgo in adem ferret. Quam ra-
agnoscit: Ἀπὸ ξύλων ὃ πρὶ ἐμβαλλουσι, θάτερον τῶν ξύλων, III. De
ὡς τέρετρον, ἐν θάτερον ὡς εἰσρέφοντες: Ignem è lignis excutiunt, Cælo.

alterum lignorum, tamquam terebram, in altero circum- I.

uertentes. Tangit & Isidorus Pelusiota: & hodie ad fiduē Lib. II.
vsurpant occidui orbis Indi. Similem cerimoniam Græ- epist. x.

cis fuisse, Plutarchus tradit: sed paullo diuersam. Nam si-
quando facer ibi ignis deuixit, *negant eum fas esse ex alio
igne accendi, sed nouum parandum eliciendumque ex ipso*
2. *Sole. Quod faciunt² scaphiis siue vasculis, quæ parantur
ex latere Trigonirectanguli, quod duo latera æqualia ha-
beat: deuergunt autem ex circumferentiâ in unum cen-
trum. Cum igitur Soli opponuntur, ut radij eius in ipsum
centrum cogantur & implicentur, aëre attenuato, fomen-
ta leuissima & siccissima apponunt, quæ facillimè per re-
nixum & reflexionem concipiant accensum ignem. Hæc
ita alibi: Romæ, ut dixi. Addo, etiam sine interstinctione
vllâ Ignis, solere nouum accendi, nouo anno. Macrobius:
Primâ die Martij, ignem nouum Vesta aris solent accen-
dere, ut incipiente anno curâ denuò seruandi nouati ignis
inciperet. Ouidius:*

Lib. 1. Sa-
turn. cap.
xii.

Adde, quod arcanâ fieri nouus ignis in ade

Dicitur, & vires flamma refecta capit.

Vterque adducit, & argumentum habet, pro Martio, du-
ce olim anni: ut sciamus annum, cum Vestales à Numâ
institutæ, nondum sic auctum & correctum. Nam Mar-
tius certè postea non princeps. Addit Ouidius:

xii. Fast.

Vesta quoque ut niteat folio velata recenti,

* id est, ve-
tus

Cedit ab Iliacis laurea cana focis.*

Eodem illo primo die reliqua scilicet innouabant, & lau-
rus veteres tollebant, nouas surrogabant.

NOTÆ.

i. Tamquam terebram, in altero circumuertentes.] Hoc ge-
nus Igniarij Theophrastus agnoscit, v. de Plantis, in fine: ubi & Tere-
bram è Lauru sæpè factam ostendit. Πορία μὲν, inquit, γίνεται ἐκ πολλῶν
ἀεισῶν

αἰετα δὲ ἐκ καρύου: & addit alia quadam item ligna, vt Rhamnum. Tum
 deinde: Δεῖ δὲ τὴν ἐχάραξιν ἐκ τούτων ποιεῖν, τὸ δὲ τρύπανον ἐκ δάφνης: Ignia-
 ria è multis lignis fiunt; optima è nuce iuglande. Oportet autem
 receptaculum ex illis facere, at terebram ex lauru. Hunc locum op-
 portunè suggestit vetus amicus, Hieronymus Mercurialis, litterariâ om-
 ni doctrinâ, & simul (raro exemplo) medicinâ clarissimus.

2. Scaphiis siue vasculis.] Ea sunt ex ære, & à Vitruvio Sca-
 phia item appellantur. De formâ, aut formatione, obscuriuscula Plu-
 tarchi verba: et si interpretatione aliquid ego alluxi. Vult autem dictum,
 ex circumuolutione Trianguli, rectanguli, æquicruri (ἰσοσκελεῦς sic
 vertam) Vascula ista oriri, patula supernè, & in arctum coëuntia. En
 figuram.



CAPVT IX.

*Seruabant & imperij pignus, variâ interpretatione:
et si plerique ad Palladium trahant. Quid illud,
unde, ubi?*

ALTERVM Munus dixi fuisse, *Adseruare*. Quid au-
tem? arcanum IMPERII PIGNVS, vt appellabant.

Lib. xvi. Liuius: *Vestæ ademptam, & æternos ignes, & condi-*

Lib. ix. *tum in penetrali fatale imperij pignus. Lucanus:*
— *in abstruso pignus memorabile templo.*

vi. Fast. Ouidius:

Vidimus Iliacæ transferri pignora Vestæ.

III. Con- Seneca pater: *Veniet ad colendum Romani imperij pi-*
trou. lib. i. *gnus carnificis manu incesta? Quid autem pignus istud
& cuiusmodi fuerit, in arcanis habebant: & ideò variant
auctores. Dionysius ait: Εἰσὶ δὲ πινες οἱ φασι νῦν ἔξω τοῦ πυρὸς
δοτόρηνται τοῖς πολλοῖς ἱερὰ κείσθαι ἵνα ἐν τῷ τεμένει τῷ θεῷ, ὡς οἷτε
ἱεροφάνται τὴν γνώσιν ἔχουσιν καὶ παρθένοι: Sunt qui asserant,
præter ignem, arcana & multitudini non efferenda sacra,
in deæ templo esse deposita, quorum Pontifices notitiam
habeant, item quæ ipsæ Virgines. Addit signum huic rei cer-
tum, quod cùm templum olim arderet, L. Metellus Pon-
tifex, trepidantibus Virginibus, irrupisse in ardens pene-
trale dicitur, & Sacra è flammis eripuisse: id quod sub-
scriptum statuæ eius in Capitolio legebatur. Iterumque
Dionysius: Huic rei confesse, addunt coniecturas suas.
alii seruari sacrorum partem è Samothraciâ, quæ Darda-
nus Troiam, Æneas in Italiam aduexerit: alij calo de-
lapsum Palladium, quod verum idem Æneas ad sportarit.*

nam

nam falsum & adsimilatum Achivos furto sustulisse.
 Hæc ille: videamus. Prima opinio de *Sacris Samothracum*, quæ & in Plutarcho expressa: *censere quosdam, deos* ^{In Camillo.}
Samothracum hîc condi: ^{I.} quos cum Penatibus alij confundunt. Videaturque Tacitus in hac parte, vbi de Neroniano incendio: *Numa regia, & delubrum Vestæ,* ^{xv. Annal.}
cum Penatibus populi Romani exusta. quasi Penates ecce illîc asseruati. Sed potest & aliter capi, vt Vestæ delubrum, itemque Penatium templum, haud procul inde in Veliâ, sint exusta. Altera opinio, de *Palladio*, quæ in vulgus maximè recepta est, & nobile illud fecit ac decantatum. Quid appellamus? ^{2.} *Palladis minutam effigiem,*
Græcanicâ sermonis formâ. Eustathius: *Τὰ ῥ Πάλλαδ' εἰδωλα, Παλλάδια, τῆς παλαιῆς ὀνομαζόντων.* ^{In 1. Iliad.} *Palladis imagines Palladia antiquis appellantur.* Multa super isto multi: Apollodorus intellegendo sufficiet. *A celo hoc delapsum est,* ^{III. Bibl.} *& floregi traditum.* Erat autem magnitudine tricubitale: *habitu quasi ingredientis: dextrâ hastam, sulatam præferebat, sinistrâ fuscum & colum.* Exstant in gente Iuliâ Numi, quibus Æneas insculptus visitur, sinistrâ Anchisem humeris tolerans, dextrâ Palladium istud gestans. Itaque plurimum, vt dixi, hæc opinio. Liuij, vt apparet: *Quid de eternis Vestæ ignibus, SIGNO QVE, quod* ^{Lib. v.} *imperij pignus custodiâ eius templi tenetur, loquar? Signo, nempe hoc Palladis.* Lucani certè:

— nulliq; adspecta virorum

Pallas, in abstruso pignus memorabile templo.

Obserua, *nulli virorum*: solis ergo Virginibus fas videre.
 Idem poëta, de Vestali:

Troianam soli cui fas vidisse Minervam.

Lib. I.

Sed nec Pontifici Maximo fas : etsi esse sciebat & coli : ex Dionysio supra adstructum. Itaque nec impune Metello fuit vidisse, ut seruaret. Plinius : *Metellus orbam luminibus exegit senectutem, amissis incendio, cum Palladium, raperet ex ade Vestæ.* Ceterum & Cicero in hac sententiâ:

Phil. xi. *Qui (Brutus) ita conseruandus est, ut id signum quod de celo delapsum Vestæ custodiis continetur : quo saluo salui sumus futuri.* Nam ait, *de celo lapsum.* Propertius:

Lib. iv.
Eleg. iv.

*Palladis extinctos siquis mirabitur ignes,
Ignoscat, lacrymis spargitur ara meis.*

Camillo.

Vbi & ipsum cultum ignium Palladi adscribit. Sicut in Martyrologiis quibusdam nostris, *Daria scribitur Minervæ sacerdos fuisse* : quæ aliis simpliciter est *Vestalis*. Tertiam opinionem licet addere, ex Plutarcho: *Qui plus in his rebus volunt sapere, duo Dolia haud magna recondi aiunt. atque unum ex iis plenum esse, obsignatumq; alterum vacuum. utrumque tamen solis virginum oculis usurpandum.* Quæ dant & capiunt lucem c. Lampridio, in Eligabalo: *Qui penetrare, inquit, sacrum auferre est conatus. cumq; Seriam (sive Dolum) quasi veram rapuisset, quam Virgo Maxima falsam monstrauerat. atque in eâ nihil repperisset, applosam fregit.* Sed idem Lampridius an non subindicat in ipsâ Seria Palladium hoc fuisse? Nam de eodem principe, an pecude, ait: *Signum quod Palladium esse credebat, abstulit.* Incerta hæc igitur: & bono religiosoque animo Dionysius; *Ego, inquit, adseruari à Virginibus non ignem solum, sed & Sacra quædam vulgo incognita. multis indiciis colligo : sed quæ ista sint, neque me, neque alium qui religiosè deos & diuina colit, inquirere curiosè oportere arbitror.* Atque ipsi fanè Roma-

Romani velabant, si non vetabant. Itaque in operto habebant, in adyto & Penetrati, quod *Penum* vocabant. Festus: *Penus vocatur, locus intimus in ade Vestæ tegetibus septus: qui certis diebus circa Vestalia aperitur. Ij dies religiosi habentur.* De eodem etiam Lampridius: Impius ille Eligabalus *Penum Vestæ, quò solæ Virgines, soliꝫ Pontifices adeunt, irrupit.* Ergo & Pontifices? apparet, sed non vt viderent. Adire, hoc satis iis fuit. Sed nõne ipse Eligabalus, exemplo omnium Principum, tunc Pontifex maximus? certè, & Numi centeni dicunt. Quid ergo Lampridi culpas? hætenus non potes, nisi quòd abstulit tamen, & conatus videre. Nefas. atque ita Herodianus, vt prodigiosam rem narrat: quòd Commodi imperio *Vestæ templum arserit, & nudũ visum sit Palladium,* Lib. i. quod Romani & colunt maximè & celant: visum, dico, tunc primùm post allatũ ab filio in Italiam. Legas, & hæreas. ergone tunc primùm? Atqui & à Metello Pontifice raptum ex incendio, & cõspectum vnà dicas (vnde enim oculi aliter amissi?) & in Dione scriptum, sub Augusto *Vestam arsisse, & Virgines Palladium extulisse, ac po-* Lib. xiv. *uisse in domo Augusti.* Sed dicere licet ac credere, nudum non visum, quod in Herodiano erat; sed velamento suo, siue Seria, obductum. Ac talis fortasse in Statio sensus, & allusio: vbi Tydeus Palladi vota faciens, ait;

Peruigilemꝫ focus ignem longa sacerdos

Nutriet, arcanum non inspectura pudorem.

Lib. ii.
Thebaid.

Hic Scholiastes vetus: *Arcanum Pudorem dicit, aut eius simulacrum verum, id est Palladium: quo quidam (Metellus) quondam viso, priuatus est visu: aut virginitatem eius.* Etsi magis pro verbis Statij videatur altera interpretatio

Lib. VI.

tatio de *Virginitate*, siue Virginal mauis dicere : atque eam partem in hoc signo semper, religione quâdam obuelatam fuisse. Non ita in aliis, quæ nudare, lauare, vngere solenne erat. Satis de Palladio. vnum ex Dionysio subtexto ambiguae vel obscuræ notitiæ : *Nautium* quemdam è comitibus *Æneæ*, sacerdotem *Minervæ Urbicæ* fuisse, eiusq; simulacrum secum *Troiâ* extulisse. quod, inquit, asseruabant alij ab aliis suscipientes, quicumq; eius gentis essent. Estne de isto nostro, an alio? an iam olim dumtaxat adseruauit ea gens, ante conditum *Vestæ* templum? Etsi *Cedrenus* à *Romulo Martis* adem sacratam vult, & in eâ repositum tunc *Palladium*. *Ouidius* etiam de auctore vel aduectore *Palladij* fatis incerto :

vi. Fast.

* *Diomedes*

Seu genus Adraſti, ſeu furtis aptus Ulyſſes,*
Seu pius Æneas, eripuiſſe ferunt.
Auctor in incerto eſt. res eſt Romana: tuetur
Veſta, quòd aſiduo lumine cuncta videt.

NOTÆ.

I. Quos cum Penatibus alij confundunt.] Et Nummi sunt, qui huc facere videntur, & Penates *Vestæ* iungunt. vt iste.

N. Com. Imp. Æ.



2. Pal-

2. Palladis minutam effigiem.] In Nummis sepe expressam:
 & hîc vide.

Num. Argent.


N. Iul. Cæs. R.



Neronis Aur. et R.

Vespas. A. Item Titi.

Iulia Pia R.



Item ex restitutione
 Traiani Imp. cum
 hac inscriptione
 IMP. CAES.
 TRAIAN. AVG.
 GER. DAC. PP. RES. P.

CAPVT X.

*Sacra etiam assidua faciebant. an & Aqua cura-
 bant? an Draconi? hac inquisita: & aliquid de
 Deo Fonte.*

TERTIVM dixi Munus *Sacrificare*. Atque id ad-
 fiduum penè erat, diu noctuque. Seneca, De Proui-
 dentiâ: *Quid porrò? non est iniquum nobilissimas Virgi-* Cap. v.
nes ad sacra facienda noctibus excitari, altissimo somno
inquinatas frui? Prudentius:

Hoc illud meritum est, quod continuare feruntur

Excubias, Latij pro maiestate Palatij.

Et ¹ in Nummis passim Vestalis sacrificans, ipso habitu
 quem Festus describit: *Armat a virgo dicebatur sacrifi-*

E cans,

II. contra
 Sym.

I.

cans, cui lacinia togæ in humerum reiecta. De quo cultu aliquid & idem Festus: Suffibulum, vestimentum album, pretextum, quadrangulum, oblongum, quod in capite Vestales, cum sacrificant, semper habent: idq̃, fibulâ comprehenditur. De sacrificiis autem ipsis, aut eorum ritibus, longum & tenue sit hîc dicere: omitto. quod dubium sit, magis inquirō. Etiâ mne Aquę Virgines curabant? Ex Suidâ hoc adstruitur: Νοῦμας τὰς Ἑστιάδας παρθένοις ἔπυρρός τε ὕδατ' & τὴν ἐπιμέλειαν ἔχειν ἀετέρεσσι. Numa Virgines Vestales IGNIS ET AQUÆ curam habere demandavit. Totidem ferè verbis hoc legas in Georgio Cedreno. Cur tamen alij veterum silent? aut quæ hæc Aquę cura? Opinor non aliâ, quàm quòd Fonti Camœnarum præessent. exquæ eo solo aquam ad sacra peterent. Possit sanè aliquis ad Physiologiam referre, quasi duo rerum principia coli Numa voluerit: sed ad rem ritumque firmandum Plutarchus nunc adhibeatur. Ait, Numam prætæ & campum, ubi plurimum cum Egeriâ versatus esset, Camœnis consecrassē: tum addit: Τὴν ὃ πηγὴν, ἣ κατὰ τοῦτο χωρίον, ὕδατις ἐξ ἧς ἀποδείξαι ταῖς Ἑστίαι παρθένοις, ὅπως λαμβάνουσαι καθ' ἡμέραν ἀγνίζωσι & ραίνωσι τὸ ἀνὰ τοῦτον: Fontem autem, qui locum irrigat, AQUAM SACRAM Virginibus Vestæ attribuisse, ut ex eo COTTIDIE haurientes purificarent & aspergerent sacram adem. Nisi hæc aqua sit, cuius curam gesserint, non reperio: ad cottidianam quidem lationem illam, scio & Ovidium respexisse, dum de Silviâ Vestali scribit:

Sacra lauaturas manè petebat aquas:

etsi ex alio fonte ea (quippe sub Amulio) sumpsit. Itemque in Persio hoc fine, *Vestales urnas legas.* & in Propertio

pertio de Tarpeiâ:

Vrgebat medium fœctilis urna caput.

Sed vt obiter addam, ille Fons Vestalibus dedicatus, sacer habitus, & in Deos etiam relatus, delubrum postea accepit. de quo Iuuenalis:

Nunc SACRI FONTIS nemus & DELVBRA locantur Sat. III.
Iudæis.

Cicero: *Fontis delubrum Maso ex Corsicâ dedicauit.* Fe-
stus: *Fontinalia, fontium sacra, unde & Fontinalis por-* III. De
ta. Inò singulariè (& sic corrige) *Fontis sacra.* Symma-
Diuiuat.

chus: *Sed enim præterea etiam Camænarum religio, &* Lib. I.
SACRI FONTIS, *adnectitur:* ita malo, quàm *aduertitur,* epist. XIV.

ex scriptoris mente. Fuit & alia aqua Vestę haud longin-
qua, Iuturnę fons & lacus: sed de eâ, quod huc faciat, ni-
hil legi. Simili in ambage vel nube est, quod in Siluestri
Pontificis Actis quibusdam legitur, *Draconis eum ora*

clausisse, & perpetuo ergastulo mæcipasse: cui Kalendis sin-

gulis à Virginibus Vesta suppeditari solita sint alimenta.

Nam quis veterum tale aliquid? eoque sperni aut abiici à
magnis viris, vt falsa, video: me cunctante, an non Ter-
tullianus huc adspexerit, hisce verbis: *Roma quidem, quæ* I. ad Vxor.
Ignis illius inextinguibilis imaginem tractant, auspicia cap. VI.

pœna sua cum ipso DRACONE CVRANTES, de virginitate

consentur. Profectò dicit & Ignem curasse, & Draconem:

vt rumque in imagine futurorum. Neque nimis abhor-

ream, talia quædam, præter morem veterem, nouitiâ su-
perstitione, & causâ aut casu aliquo, adsumpta: quæ ideo
priscis nec dicta. Draconem quidem vnâ cum Bonâ Deâ
cultum, hoc legi: sed quid ad Vestam? in quâ pergo.

NOTÆ.

1. In Nummis passim.] *Sacrificia & sacrificantes exprimuntur, & item vasa sacrorum. vt in istis.*


Hadriani Imp. Æ.



A. R. & Æ.



Num. Argent.



CAPVT XI.

Premia & privilegia earum. Ius testandi, LiCTOR, Carpentum, aliaq; data.

MVNIA & labores vidimus: nunc iustè *Premia & honores*, quibus ad illa excitatæ. Pleraque eorum Plutarchus exsequitur: & siquid defiet, addam. Ait: *Honores magnos Numa iis tribuit. veluti quòd vino patre testari possint, atque alia facere sine auctore (ὅν οὐδεὶς ἄτοῦ) eo modo & iure, quo matribus trium liberorum id permissum. Item liCTOR præcedit exeuntes. Quòd si reo, ad supplicium qui ducitur, fortuitu factæ sint obuia, is pœna liberatur. Oportet autem iurare, à casu, non à consilio, fuisse hunc occursum. Qui verò lecticam earum aut sellam quâ vehuntur subit, morte id luit. Hęc more nostro lustremus paullùm, & illustremus. Ait primò, ius testandi habuisse. scilicet quia statim exhibant è patriâ aliaq; omni potestate:*

& æta-

& ætatis deliquium leges benignè supplebant. Adèò vt
 vel *sexennes*, id est primo anno quo captæ, testari possent.
 Sozomenus disertim: Οἱ πάλα Ρωμαῖοι ἀδεῶς διατίθεσθαι ^{I. Eccl.}
 ταῖς ἑστιαπικῶς παρθένους, ἃ ἐξαετῆς ἔσας, ἐνομοτέθησαν: ^{Hist. c. 1x.} *Prisci*
Romani liberè testari Virgines Vestales, etiam sexennes,
lege sanxerunt. Addit Plutarchus, *Premia habuisse, qua*
trium liberarum matres. At reuerà non Numa hoc (neque
 enim tunc de isto iure) sed Augustus instituit. quod Dio
 in loco & anno suo scripsit: Ταῖς, inquit, ἀειπαρθένους παῖθ', ^{Lib. 1v.}
 ὅσα πρὸς καὶ τεκοῦσαι εἶχον, ἐχαρίσατο: *Vesta Virginibus om-*
nia, quæ matres habebant, indulgit. Alius honos: *precede-*
re & deducere lictorem. Id quoque non à Numâ, sed
 Triumuiris referunt acceptum. Dio Cassius: Ταῖς ἀειπαρ- ^{Lib. xlvir}
 θένους βαβδούχῳ ἐν ἐκάστῃ χεῖρῳ ἔδωκεν: *Virginibus Vesta*
singulis lictore uno uti dederunt. Et causam siue ὡρίφασ-
 σιν addit. quòd vna aliqua earum vesperi à cœnâ rediens,
 & incognita, malè habita ac violata esset. Tutela igitur
 & decus, Lictor additus. Seneca pater: *Procedente hac* ^{I. Con-}
*liktor submouere iubebitur: huic Prætor viâ cedet: sum-
trum imperium Consules cedent tibi. In eodem alibi: ^{vi. Con-}
tou. vlt. *Tibi magistratus suos fasces submitunt: tibi Consules Præ-*
toresq; viâ cedunt. Numquid exiguâ mercede virgo es?
 Attende: omnem honorem huic sacro ministerio, & ipsos
 Consules cessisse. Quartum in Plutarcho: *morte liberaffe,*
illi addictos. Credo: sed de Iuramento fortuiti occurfus
 nodum aut remoram habet. quomodo enim? cùm nec
 iurare omnino Vestalis deberet? Ita sanè in edicto Præto-
 ris perpetuo, apud Agellium: *Sacerdotem Vestalem, &* ^{Lib. x.}
Flaminem, Dilem, in omni iurisdictione meâ iurare ^{cap. xv.}
non cogam. Nec de iuramento controuerto: tamen in foro*

auditas, & pro testimonio dixisse, Tacitus palàm firmat.

xx. Annal.

Missus est Prator, (de Virgulanâ quâdam, gratiosâ aulicâ) qui domi interrogaret: cùm Virgines Vestales in foro & iudicio audiri, quoties testimonium dicerent, vetus mos fuerit. Venisse igitur in forum, testes adhibitas, liquet: sed, ex Edicti verbis, non iuratas dixisse, nisi si vel-
lent. Nam est in Edicto, *non cogamur*. Religionis igitur honore, voluerint vel iniuratis credi. Vltimum in Plutarcho: *Siquis lecticam subisset, morte plecti*. In Græco est, *ῥοῤεῖον*: *gestamen*. Quod commune nomen est, & plurimùm Lecticam aut Sellam signat: atque ita latas, cùm mos suadet, tum Ambrosij de ipsis verba: *Pompa lectica, ministrorum circumfusa comitatu*. Sed addo, & Pilentosive Carpentos plurimùm vectas. Prudentius:

Contra
Sym.

*Fertur per medias, ut publica pompa, plateas
Pilento residens molli.*

xxi. Ann.

* Vide me
in Com-
ment.

Tacitus: *Suum quoque fastigium Agrippina altiùs tollere, carpento Capitolium ingredi: qui mos* sacerdotibus & sacris antiquitus concessus, venerationem augebat feminae*. Sacerdotibus, nempe istis Vestæ, sed & Flaminibus

Lib. i.

olim. Liuius: *Ad fidei sacrarium Flamines bigis, curru arcuato, vehi iussit*. Quis ille currus arcuatus? carpētum, id est tectum supernè, & cameræ in modum. Talia enim hæc fuisse, Nummi hodie dicunt, qui plures exstant: neque à *Thensâ* nimis diuersum fuit. Id quoque enim vehiculum sacrorum. Quia igitur ita tectum, & velut solidum perfectumque vehiculum; Dio Cassius dixisse videtur & circumscripsisse, *ἀρμα ὄλον*. Ut in honoribus Iulio

Lib. xlii.

Cæsari, tamquam Deo decretis: *Ἰσσερον ὃ ἐστὶν ἀρμα ὄλον ἐν ταῖς ὑποδρομαῖς, μὲν τῶν θεῶν ἀγαλμάτων, πέμπεται ἔγνω-*

ἔδω:

Cdo: Denique & currum integrum, siue *Thensam*, unà
 cum *Deorum statuis*, in *Circum* inferri decrêrunt. Simi-
 le in libro sequenti, de eodem *Iulio*: Καὶ ἐν ταῖς ἱπποδρομίαις
 ὁ χλὸν εἰσάγεσθαι ἐψηφίζοντο: Legendum videtur, ὁ χλὸν ὄλον,
 ex prior loco: si tamen lectio illa certa. Id esset: *Et in*
Circensibus thensam introduci censuerunt. Suetonius ad
 ista: *Quadam* ampliora humano fastigio decerni sibi
 passus est, *Thensam* & *Ferculum Circensi pompâ*. Ita-
 que non nimis diuersa (quod ad formam) *Thensa*, *Car-*
pentum siue *Pilentum*: sed prius illud diis adtributum,
 alia eorum etiam ministris. Sed ad Vestales. quid ergo
 vult Plutarchus? *Siquis subisset*, inquit. nōne per pro-
 teruiam aut ludibrium, & quasi velandis illis reuelandis?
 An significat, in idem vehiculum ascendisse? Et apparet
 tale aliquid factitatū ab improbulis, in matronarū trans-
 uersione: sed hīc, honori Virginum, morte vindicatum.

CAPVT XII.

Item ornamenta aut insignia: ut Vittæ, Purpura in
in veste, Stipendia & Agri, Auctoritas in de-
precando.

ATQUE isti honores siue prærogatiuæ ex Plutarcho:
 alias alibi repperi, opportunè adtexendas. Sicut in
 p̄so cultu aliquid eximium. inprimis *Vittæ* in capite, vt
 in Deo Deæve consecratis. Prudentius:

— *sedet illa verendis*

Vittarum insignis phaleris.

dem explicat:

— *cingunt*

Tempora taniolis, & licia crinibus addunt.

Oui-

Ovidius, de Iliâ iam compressâ:

Decidit ante sacros lanea vitta focos.

Ingeniosè. quasi non iam Vestalis, amissâ virginitate, nec dignanda illis insignibus. Sic Dionysius scripsit: *Licere nubere, post annos impletos*, ἀλλ', inquit, ἀποδείσας τὰ ἑμματα, καὶ τὰ λοιπὰ τῆς ἑρσυνῆς ᾠδῶσιν. *sed depositis vittis, & quæ alia sunt Sacerdotij insignia.* Quæ igitur alia? In Ambrosio aliquid: *Infule vittati capitis, purpuratarum vestium murices.* Nota & vestes purpuratas fuisse: nempe prætextâ eas vsas, id est limbo in oris purpureo. Nam ita Magistratus, atque item (ex Liuvio aliisque) Sacerdotes. Ergo & Vestales, vt suprà in *Suffibulo* obserues. Non pugnat cum istis Suidas, qui scripsit: Οὐ μύρω, οὐκ ὀύρεσιν, οὐχ ἱματίῳ χεῖνται συνεχωροῦντο πλὴν λαοῦ. *Non unguento iis, non floribus, non veste uti concesserunt, nisi albâ.* Quæ vera sunt, & inducta contra lasciviam: sed purpuratas eas, non purpureas dicimus fuisse. Veste albâ vsæ, sed limbo, vt diximus, punicante: non tamen floridâ, aut variegatâ, vt aliæ solent. In carbaso etiam aut tenui lino fuisse, ex Valerio & Dionysio aliquis dicat: vbi de Æmiliâ Vestali. Dionysius quidem: *auulsisse & defregisse* ait, ἀπὸ τῆς καρπασίνης ἐδῆτο, ὡς ἔτυχεν ἐνδεδικῆα, τὴν τελαμῶνα: *à carbasinâ suâ veste, quam indutui habebat, laciniam, & imposuisse Aræ.* Nec de cultu alia habeo: nisi capillum in spiras quasdam plexum & diuisum, tum vittis illigatum, à tergo & in ceruices anulatim dependisse. Prudentij ea mens:

*Perfundunt quia colla comis benè, vel quia cingunt
Tempora taniolis.*

Neque enim vult perfundi vel flagellari sparso capillitio,
fec

sed sic aggesto & suspenso. In Statuâ Romæ repertâ (quâ in fine repræsento) palàm videbis. Aliquis etiam ambigat, an non tonderi solitæ (ritu nostrarum Virginum quæ Deo sacrantur) ex Plinio : *Antiquior est lotos, quæ capillata dicitur, quoniam Virginum Vestalium ad eam crinis defertur.* & Festo : *Capillatam vel Capillarem arbo-rem dicunt, in quâ capillum tonsum suspendebant.* Semel igitur tonsæ, atque in ingressu, fortasse : & capillum hunc Deæ Vestæ suspendebant. An & aliàs crinem eò, caducum, vulsum, scissum, deferebant? in obscuro hæc, atque etiam in paruo. Magis nouum & notandum de Bullâ, siue Phylacterium, aut aliud ad Ornatum fuit, quod in dictâ illâ Statuâ à pectore dependet : vide, & quæ ibi notantur. Addo, præter hæc Ornamenta aut Insignia, res & fructus etiam accessisse : id est, Stipendia & Opes. Liuius, de ipso Numâ : *His stipendium de publico statuit* : ut vacuæ scilicet ab aliis curis, Deæ & sacris operarentur. Et credo agros à Numâ adtributos, quorum vectigalibus alerentur. Incertus auctor, de Limitibus : *Ut nominibus vetustis utatur. ut, vectigalis ager Virginum, Vestearis* : nempe, non *Vestalis*, ut vulgò. Hyginus item, de Limitibus : *Virginum quoque Vestalium & sacerdotum quidam agri vectigalibus sunt redditu locati.* Sed & Augustus adiecit, de quo vniuersè Suetonius : *Sacer-* Cap. xxxi.
dotum & dignitatem & commoda auxit, PRÆCIPVE *Vestalium virginum.* Aliquid in Catalogo Coloniarum, quem scriptum vidi : *Lanuuium muro cinctum*, colonia deducta à D. Iulio. *Ager eius, limitibus Augustæis, pro parte est adsignatus militibus veteranis, & pro parte Vestalium, lege Augustianâ, fuit.* Imò & alios agros habue-

runt, à priuatis pietatis ergô (vt hodieque solet) legatos : quos omnes Fiscus eripuit sub Valête & Theodosio Principibus , inuidiosâ & disertâ sanè Symmachi querelâ : *Agros etiam, inquit, Virginibus & ministris deficientium voluntate legatos Fiscus retentat.* Plura addit, atq; arguit: & Ambrosius noster contrâ obducit: *Sola sublata sunt pradia, quia non religiosè utebantur iis, quæ religionis iure defenderêt.* Sed præter Agros, video & Pecuniam interdum cepisse. Tacitus, de Tiberio: *Cornelia Virgini, quæ in locum Scantiae capiebatur, HS. vicies dedit, quæ sunt nobis, quinquaginta Philippæorum millia.* Hem, vni virgini? sic fuit. nec immeritò obiicit iis Ambrosius, *Præiugia maxima, LV CRA ingentia.* Atque inter Priuilegia, addamus: etiam ludis certo & honestissimo loco spectasse. Suetonius: *Virginibus Vestalibus locum in theatro separatim, & contra Prætoris tribunal, dedit Augustus:* de quo nostra in Amphitheatro, sis, vide. Deniq; , vt finiam, Auctoritas earum maxima, & in precibus, aut aliâ re, vix repudianda. Cicero, cùm pro Fonteio causam diceret, sororis eius Vestalis intercessione vsus: *Superbũ sit, inquit, eius obsecrationem repudiare, cuius preces si Diæ aspernarentur, hæc salua esse non possent.* Atque inter exempla est

I. ¹ Claudia Vestalis, quæ fratrem iniussu populi (in Suetonio) triumphantem, adscenso simul curru, vsque in Capitolium profecuta est , ne vetare aut intercedere cuiquam, Tribunorum fas esset. Adeò & leges & magistratus reueriti sunt hanc impotentem, vt sic dicam, potestatem. Adde Suetonium in Iulio cap. i. in Vitellio cap. xvi. Tacitum III. Historiarum, & plures.

III. Ann.

In Aug.
cap. xliij.I.
Tiber.
cap. II.

NOTÆ.

1. Claudia Vestalis.] Cuius imaginem visum appingere è Fulvii Vrsini gemmâ.

CLAUDIA VESTALIS.



CAPVT XIII.

Contrà, Pœna cùm peccassent, cum euo varia: sed sollemnis & nobilis à Tarquinio Prisco. Pontifices arbitros fuisse: conuictam, defossam: & quæ huic rei.

HÆC Præmia igitur, sed Virginum: nam pollutarum Pœnæ etiam grandes & graues. Vetus lex fuit, Festo prodita: *Probrum virginis Vestalis ut capite puniretur, vir qui eam incestauisset, verberibus necaretur.* Lex

fixa in Atrio libertatis, cum multis aliis legibus incendio consumpta est, ut ait M. Cato. Sed cuius hæc lex? credam Numæ regis, qui simpliciter statuit incestam lapidibus obrui, sine aliâ supplicij pompâ: in Cedreno scriptû. Alia autem Albæ, ante Romam conditam: quæ iuberet pollutam virgis ad necem cadî, Dionysio in rebus Iliæ tradente. Sed Tarquinius Priscus, qui numerum earum auxit, idem & pœnam, & conspicuam magis horrendamque fecit. Sic enim in Zonarâ: Vestalium corruptam, unam, ¹ specu subterraneo oblongo excavato, atque ibi lectulo posito, & lucernâ, & mensâ cibis refertâ, deducen-

I. *tibus eam multis, vinamque, includens obstruxit. Et sic deinceps pollutæ puniri obtinuit. Qui autem polluerint, in lignum biceps, siue in furcam, collum inserunt, in ipso foro: atque ita ad necem eos cadunt. Dionysius pariter ad Tarquinium refert, & primam sub eo Pinariam quamdam supplicio isto affectam. Quod vberius clariusque tamen narrat, & verba eius digna apponi. Pœna, inquit, delinquentibus graues constituta: quarum arbitri & exactores sunt, ex lege, Pontifices. Qui virgis quidem cadunt compertas leuioris delicti: probrosas verò & incestas fœdissimo & maximè miserabili mactant supplicio. Viuæ enim, funebri ritu & pompâ, efferuntur: amicis accognatis, cum luctu & lacrimis, comitantibus. Delatæ autem ad portam Collinam, intra muros, subterraneâ in cellâ, cum funeralibus ornamentis, deponuntur: nec monumento porro dignatæ, nec parentalibus, aliisque sollennibus defunctorum. Ita Dionysius: inhereamus paullum, & magis etiam diffundamus. Ait, Pontifices arbitros. quod in omni earum culpâ siue delicto obtinuit, causamque apud hoc*

tribu-

tribunal dixêre. *Liuius: Postumia Vestalis de incesto caus-* Lib. i v.
sam dixit. ampliata, deinde absolutam, pro collegij sen-
tentiâ Pontifex maximus abstinere iocis, colique sanctè
potius quàm scitè iussit. Nota obiter, & iocos & cultum
 scitiorem vetita. Quo ad spectu Declamatores Vestali di-
 cam ob carmen istud scribunt: *Felices nupta. moriar, nisi* Senec.
nubere dulce est: & addunt, Tu carmen scribas, tu verba lib. vi.
pedibus suis emollias, & seueritatem templo debitam mo- Controu.
dulatione frangas? Atque ibidem ostenditur, *omnis cul-* vlt.
tus luxuriosior, conuersatio cum viris licentior, iis interdi-
cta. Amplius nota, Pontifices omnes, id est collegium iu-
 dicasse: Pontifice tamen maximo conuocante, & præsi-
 dente. Plinius: *Cùm Corneliam Maximam Vestalem* Lib. i v.
defodere viuam Domitianus cupisset, ut qui illustrari sa- epist. xz.
culum suum eiusmodi exemplo arbitraretur: Pontificis
maximi iure, seu potius immanitate tyranni, licentiâ do-
mini, reliquos Pontifices non in Regiam, sed in Albanam
villam conuocauit. Vbi hoc culpat, non Pontifices con-
 uocatos, sed in talem locum, id est Albanam villam: cùm
 sollenne esset, in Regiam conuenire, quæ ad sita templo
 Vestæ. Ad hanc Pontificis maximi cognitionem Statius
 respexit, Domitiano blandiens:

Templa superfulges, & prospectare videris,
An noua contemptis surgant pallatia flammis
Pulchrius? an tacitâ vigilet face Troicus ignis,
Atque exploratas iam laudet Vesta ministras?

In Equo
Domit.

Itemque Ouidius:

Si mihi bellandi pater est Vestæq; sacerdos
Auctor, & vlciſci nomen utrumque paro.

v. Fast.

Quæ facit Augustum dicere, parantem vlciſci mortem

Iulij, & Patris sui, & Pontificis maximi. Neque enim aliud voluit, cum *Vestæ sacerdotem* scripsit: curantem scilicet huic Deæ, & sacra eius tuentem. Lego & in lapidibus: PONTIFEX VESTÆ. quo sensu? an quia proprius aliquis ei fuit? Præter hunc Maximum, Romæ nemo: & magis fortasse sit tales titulos ad prouincias coloniasque

2. referri: vbi cum nullæ Vestales, Pontifex aliquis & velut Flamen proprius ei Deæ fuit. Moneo etiā, inferiore æuo aliquid huic pontificio detractum. & cognouisse quidem de culpâ, pœnam tamen non exegisse: quæ Præfecto urbis referuata fuit. Disces è Symmacho clarè: qui *atque*

Lib. IX.
epist. CXX-
II. & seq.

proximâ id institutum ostendit, id est Christianorum Principum aliquâ lege, nisi fallor. Sed ad Dionysium. addit: *Funebri pompâ* efferrî. quod Plutarchus etiam expressiùs: *Lecticâ inditam per Forum deferri, clausâ undique & loris reuinctâ, ut nec vox eius possit exaudiri.* At-

In Numâ.

Lib. VIII.

que hoc de Foro, alibi item Dionysius, vbi de *Opimiâ* Vestali (Liuius est *Oppia*.) *quam Pontifices, inquit, damnarunt, & demptis è capite vittis, per Forum traduxerunt, vinamque defoderunt.* Vbi & Vittas atque ornamenta vides ablata, quia scilicet polluisset. Ouidius:

Nullaq; dicetur vittas temerare sacerdos

Hoc duce, nec vitta defodietur humo.

Pergit Dionysius: *Amicos cum luctu comitatos.* Plutarchus autem, non amicos tantum, sed *totam ciuitatem in luctu & gemitu ponit, neque ullam in eâ diem tristio rem.* Obuios autem viâ decedere, vasto ubique silentio, attonitosque omnes stare, aut comitari. Amplius Dionysius: *Ad portam Collinam delatas.* ad locum nempe, qui *Sceleratus campus* ideò dictus. Festus: *Sceleratus cāpus proximè*

por-

portam Collinam, in quo virgines Vestales, quæ incestum fecerunt, viue defodiuntur. Item Liuius: Eo anno Mucia Vestalis, factò indicio, viua sub terrâ, ad portam Collinam, dexterâ viâ stratâ, defossa Scelerato campo. ab incesto id ei loco nomen factum. Plutarchus describit, superciliosum & tumidum eum locū esse, & Latinâ voce Aggerem dici. De quo Aggere (nec enim alius iste est) ego pluscula De Militiâ Romanâ in occasione scripsi. etsi non totum Aggerem huic vsui applicamus: proximam portæ tantum eius partem. Pergit Dionysius: In subterraneâ cellâ. Græcè dixit οἶκον ὑπὸ γῆν κατεσκαδατοῦρον: adiculam sub terrâ structam: sicut Plutarchus οἶκον κατὰ γῆν, alibi οἶκον, at Plinius cubiculum, dixere. Amplius: Cum funebribus ornamentis. quod accipio, ipsam vt cadauer velatam & cultam. Zonaras suprà dicebat, Lectulum appositum, & lucernam, & mensam cum cibis. De lectulo, nescio: fuitne velut ad cibum, & vt accumberet? an magis est funebrem capere, vsui quem dicam. De aliis, Plutarchus etiam addicit, qui lucernam ardentem, panis modicum, aqua & olei, scribit deposita: ne sacratissimum, illud corpus viderentur fame consumpsisse. Dionysius deinde, in eâ cellâ deponi. Hoc est, quod Satyricus:

Sanguine adhuc vino terram subitura sacerdos.

Quod tamen priusquam fieret (ex Plutarcho) Pontifex maximus arcanas quasdam preces, manibus in celum sublati, fundebat: tum ipse suâ manu eduētâ è lecticâ in scalis constituebat: & sic carnifici ac ministris supplicij tradebat. Plinius item de Corneliâ: Cùm in illud subterraneum cubiculum dmitteretur, hæssissetq; (nempe in scalis) descendentī stola, vertit se ac recollegit. cumq; carnifex manum

Lib. v.
Dial. xiv.

In Numâ
& Quæst.
Rō. xcv.

manum daret, auersata est & resiliuit, fœdumq; contactum quasi planè à casto puroq; corpore reiecit. Atque his gestis, ait Plutarchus, scala attrahuntur, & adicula multâ humo iniectâ contegitur, donec reliquo aggeri solum adæquetur. Sed vinctam illam ibi, aut stantem sedentemve obrutam, nemo declarat: putem in lecto depositam, de quo ex Zonarâ dixi. Claudit denique Dionysius: Nec monumento, nec Parentalibus dignatas. Et de monumento vel ideò monendum, quia inculpatæ in hoc quoque eximiæ, & Vestalium cineres (ait Plutarchus) in Foro ipso recondi fas erat. At de Parentalibus, controuertat aliquis ex eodem Plutarcho, qui scribit: defossâ Vestali, ne sic quidem Romanos quiescisse, religione liberos: atq; ad eò, μετὰ τοῦτο, inquit, ἐναγίζουσιν οἱ ἱερεῖς βαδίζοντες πρὸς τὸν τόπον: usque ad hoc cui Pontifices parentant, ad locum ipsum euntes. Sed quamquam vterque eodem verbo ἐναγίζουσιν vtatur, putarim Plutarchum potius ad Expiationes aut Procurationes, quàm ad vera Parentalia referendum. Habes supplicium, & causam eius ex Ouidio:

Quæst.
Rom. xcvi.

vi. Fast.

Sic incesta perit. quia quam violauit, in illâ

Conditur: & Tellus Vestaq; numen idem est.

Etsi duplex etiam alia in Plutarcho. Vel, quia igne Romani mortuos cremant: igne autem funerare eam, quæ ignem parùm castè coluit, iniquum erat. Vel, quia corpus maximis consecratum cerimoniis occidere, aut manus mulieri adferre, nefas putauerunt. Sub terram igitur condi, cum victu appposito, vt quasi sponte exanimata videretur. Atq; hæc sollennia: Principes interdum immutarunt, aut mitigarunt. vt Domitianus: qui incesta Vestalium virginum (Suetonij verba) variè ac seuerè coërcuit: priora
(sub

(sub patre aut fratre admissa) *capitali supplicio; posteriora* (suo principatu) *more veteri*. Addit deinde, prioribus liberum mortis arbitrium permisisse; *Corneliam virginem Maximam defodi imperasse*: *stupratoresq; virgis in comitio ad necem cadi*. Quod postremum de Stupratoribus, Zonaras è Tarquinij etiam lege fuisse ostendit. Apud Declamatores reperio, *Incestam de saxo deiici*: sed scholâ, opinor, & fictâ lege.

Sen. 1.
Controll.
122.

NOTÆ.

1. Specu subterraneo.] *Legimus in Martyrum actis, de Daria, quæ Chrysantho nups erat, olim Vestalis, iussam cum marito à Numeriano Imperatore, viâ Salariâ, in Arenario deponi, atque illuc viuentes terrâ & lapidibus obrui. In quo videntur, quasi Vestalem, cum stupratore suo punire voluisse: certè ad veterem pœnam adspexisse.*

2. Vbi cum nullæ Vestales.] *Non opinor, neque è veteri scripto vlllo adstructum iri. Fama tamen & traditio est in pluribus locis, ut Agrippinæ, ut Valentianis nostris, atque alibi fuisse: sed fortasse sacerdotulas Mineræ, aut & Vestæ. sed non iis legibus aut cerimoniis quibus Romæ.*

CAPVT XIV.

Quando Vestales desierint? in Arnobio nodus, nec solutus.

FINIVI de *Vestalibus*: quæ & ipsæ finem suum sub Christianis mox Principibus inuenerunt. Quando? extremo Theodosij senioris æuo. Nam etsi concussæ antea, & periclitatæ sub Valentiniano, * Theodosio, Arcadio, quod ex Symmachi & Ambrosij epistolis constat: tamen animam traxêre ad vltimum Theodosij, id est, de-

* Is fuit
sextus
Theodosij
annus.

G cimum-

Lib. v.

cimumseptimum Imperij eius annum: cùm ille *templa claudi, & sacrificia tolli* lege iussit. Præter alios, Zosimus clarè: *Theodosius maior, eversâ Eugenij tyrannide, Romam venit, & contemptum religionum in animis omnium excitavit, publicum sumptum ultrâ dare ad sacrificia abnuens. Pellebantur utriusque sexus sacerdotes, & fana sacrificiis abolitis deserta relinquebantur.* Hæc ille. & lapides atque inscriptiones etiam testificantur, Vestales ad hoc ævi circiter perseverasse. Itaque mirum, bis mirum, Arnobium doctum illum res veteres scriptorem, *Ignem perpetuum* inter abolita aut desita iamdiu habere.

11. Aduer.
Gent.

- Ita enim Romanos alloquitur, & arguit, *identidem in alios mores ac ritus, priorum condemnatione, transisse.* Tum adiungit & adstruit: *Numquid magistratus per populum creatis? in potestatibus obeundis leges conseruatis*
 1. *Annarias? in penetralibus Vestæ ignis perpetuos seruatis focos?* quas interrogationes omnes negandi mente suscipi, palàm est. Atquin Arnobium Diocletiani temporibus vixisse & scripsisse, id quoque palàm est: id est, centum circiter ante Theodosij finem annis. Quis hæc defendit, aut soluit? nam vel maximè tunc sacra viguisse, Principibus eorum ex professo assertoribus, nemo neget. Quid etiam Symmacho & Ambrosio fiet, aliter proclamantibus? quid ipsi Arnobio in Arnobium dicenti? Nam ita in
 Lib. IIII. *iisdem libris: Sedent in spectaculis publicis sacerdotum omnium magistratuumq; collegia, nec non & castæ Virgines, PERPETVI nutrices & conseruatores IGNIS.* De suo æuo dicit: nec ego, quid de priore loco dicam aut velem, habeo: manum tollo, & auxilium spectro.

NOTÆ.

NOTÆ.

1. In penetralibus Vestæ ignis perpetuos.] *Fallor, aut vt hæc leguntur, non ipsa Pax conciliauerit cum sequenti loco, & cum vero. At enim libri scripti aliò ducunt, quod monuit me: P. Heribertus Rosvovey-
dus è Societate Iesu, vir eruditus. Illi enim: In penetralibus & coliginis perpetuos fouetis focos. Vnus: In pene inpenetrabilibus & coliginis. Sagacitatem aliorum aduoco: succurrat. Mihi nunc istud; legendum: In penetralibus & colinis perpetuos fouetis focos? Et nihil de Vestâ capio, non certè illâ publicâ: sed referam ad priuatum in edibus ritum, vbi antiquitus Ignem asseruabant & fouebant in parte interiore, & culinâ. Id factum Larium, aut & Vestæ priuatim honori. Varro in 1. De Vitâ pop. R. Colina dicta, quòd ibi colebant ignem. Nota de Cultu ignis: et si aliter fateor posse capi. An etiam placet ad Vestam publicam referri, & culignis scribi? Vt velit olim non in Arâ ignem illum structum, sed in Culignis & vasis fictilibus repositum: vti etiam nunc foueri sub cineribus solet. Si tamen Culignæ illo sensu aut vsu lectæ. quas aliqui scio vas potorium, aut sacrificale, in Festo, Varrone, Livio esse.*

CAPVT XV.

Alibi Ignis cultura, & simulacrum Vestalium.

LVBET autem pro Corollario addere, vbi locorum præcipuè cultus etiam Ignis, siue imago aliqua Vestalium fuit. Apud Iudæos primùm. & Dei iussio: *Ignis* Leuit. cap. vi. *in altari semper ardebit, quem nutriet sacerdos subiiciens ligna manè per singulos dies. Et mox: Ignis est iste perpetuus, qui numquam deficiet in altari.* Habuère & Ægyptij. ac Diodorus vult seruandi ignem perpetuum, caelesti similem, morem ab illis natum, & ad alias gentes propagatum. Item Afri. & Plutarchus auctor, in Iouis Am-

De Defe-
ctu orac.

monis *λύχνον ἀσβεστον*, siue *lucernam inextinctam*, arsisse. Silius videtur & in Arâ flammas statuere, vbi de hoc templo:

Lib. III.
initio.

Inrestituta focus servant altaria flammæ.

Lib. XXIII.

Apud Indos, Ammianus: *Brachmanes ferunt, si iustum est credi, ignem calitus lapsum, apud se sempiternis foculis custodiri.* In Persis simile. & verba Procopij: *Magnum hîc Pyraum est* (*πυρεῖον*, focus, siue *Vas igniarium*) quod Persæ inter omnes Deos maximè venerantur: vbi Ignem perpetuum custodiunt Magi. Hic est *Jgnis*, quem *Vestam olim Romani vocabant*. atque alij plures de hoc Igne.

Lib. I. I.
bell. Pers.

Lib. xv.

Idem apud Cappadoces. Strabo: *Ἐστὶ πυραθῆα, σπηκοὶ τινες ἀξιώλογοι. ἐν δὲ τυρρῖς μέσοις βωμόδς, ἐν ᾧ πολλή τε ποδοδὸς, καὶ πῦρ ἀσβεστον φυλάττουσιν οἱ μάγοι.* *Sunt Pyrathêa, sacella quâdam modica: & in iis mediis Ara, in quâ cinis multus, & Jgnem inextinctum Magi servant.* Iam in Græciæ *Prytanéis*, Pausanias sæpè commemorat ipsam hanc *Vestam* & *aternum focum*, itemque *Athenæus*, & alij: iterumque distinctè, *Mantineæ*, in templo *Cereris*; *Athenis*, in *Minervæ*; *Delfis*, in *Apollinis*. Imò & Virgines ipsas aliquot locis habuere. Tertullianus: *Noueram virgines Vestæ,*

Exhort. ad
castit. cap.
vlt.

I.

& Iunonis apud *Achaiæ ganeum*, & *Atrocis* apud *Delpbos*, & *Minervæ*, & *Dianæ*. Et quem hîc *Atrocem*, *Apollinem* interpretatur & indigetat De Monogamiâ idem scriptor. Dubitet aliquis, an non *Atrecem*, id est ἀτρεκῆ siue *Veracem*, à diuinandi calliditate voluerit dictum. Video & Persas Soli virgines sacrasse. de quibus Iustinus: *Artaxerxem regem, ne Aspasiâ pellicem filio daret, & honestè negaret, quod temerè promiserat, Solis sacerdotio præfecisse, quo perpetua illi ab omnibus viris pu-*
dici-

Lib. x.

dictitia imperabatur. Simillimum nuper, priusquam Hispani Regi & Religioni subegissent, in toto Perüano tractu. vbi crebra & magna templa dicata Soli, & iniis virgines sæpè ducentas fuisse tradunt qui viderunt : è quibus ^{P. Cieca, & Augustinus Carata.} siqua corpus polluisset, morte luebat, nisi tamen è Sole se concepisset (ride credulitatem supersticiosam) sanctè adiurasset. Satis de *Vestâ* & *Vestalibus*: quas olim nobiles, sed æuo obscuratas, iterum in lucem protraximus, bono (ita confidimus) veterum scriptorum.

NOTÆ.

I. Apud Achaiaë ganeum, & Atrocis apud Delfos.] Hæc Tertulliani, illustrissimum genus & ingenium Scaliger, legit : Achaiaë Ægium, & Apollinis apud Delphos. Non retractem. etsi P. Heribertus Rosveydus Atroce affertum ibat, & conuenire Apollini, qui apud Homerum δειὸς Ὀφός, grauis Deus dicitur: apud Statium, — arcu crudelis Apollo.

Intelligit autem *Vates* sacerdotesque Delphicas, quæ Virgines.

*Inscriptiones aliquot de VESTALIBVS in
memoriis priscis.*

Romæ, in basi, cui Statua olim superposita.

NVMISIAE. MA

XIMILLAE. * V. V.

MAX. TI. IVL. BAL

BILLVS. * S. SOLIS

DED. IDIB. IAN.

L. ANNIO. FABIANO

M. NONIO. MUCIANO COS.

* Virgini
Vestali
Maxima.

* Sacerdos.

In vrnulâ sepulchrali.

D. M.

TEIAE. EVPHROSINE S

RVFINAE. V. V.

DELICATAE.

In basi.

COELIAE. CLAUDIANAE

V. V. MAXIMAE.

A. DIIS. ELECTAE. MERITO

SIBI. TALEM. ANTISTITEM

NVMEN. VESTAE. RESERVARE

VOLVIT.

COELIA. NVMERIANA. SOROR. VNA

CVM. PIERIO. CONIVGE. AC. LIBERIS

SVIS. ORANTES. VT. PER. *TOT. SECVLA

FACERE. DII. PERMITTANT.

*Quot nē-
pe ipsi cum
liberis ef-
sent.
Egregia
adulatio.

Romæ.

* CLOELIAE. CLAUDIANAE.

V. V. MAX

RELIGIOSISSIMAE. BENIGNISSI

MAEQVE. CVIVS. RITVS. ET. PLENAM

SACRORVM. ERGA. DEOS

ADMINISTRATIONEM

VRBIS. AETERNAE. LAVDIBVS

* Suprà
Cloelia: si
tamen ea-
dem.

* S. S.

*S. S. COMPROBAT. OCTAVIA
HONORATA. V. V. DIVINIS
EIVS. ADMONITIONIBVS
SEMPER. PROVOCATA
COLLOCATA. XII. KAL. APRIL
C. AVFIDIO. ATTICO
C. ASINIO. PRAETEXTATO
COS.

**Sanctus*
Senatus.

Romæ, trans Tiberim, item in basi.

TERENTIAE
FLAVOLAE. V. V.
MAXIMAE
AVREL. IVLIVS. BAL
BILLVS. SAC. SOL
OB. PLVRA. EIVS
IN. SE. MERITA
D. D. PR. NON. APRIL.
LAETO. II. ET. CERIALE
COS.

Romæ.

TERENTIAE. RVFILLAE
V. V. MAX.
DED. PRID. NON. MAI
TITIANO. II. ET NEPOTIANO
COS

*CVR. AVRELIO. NICETA.

**Chranto*

Romæ.

Romæ.

FL. MANILIAE. V. V. MAX.
 CVIVS. EGREGIAM. SANCTIMQ
 NIAM. ET. VENERABILEM
 MORVM. DISCIPLINAM
 IN. DEOS. QVOQVE. PERVIGILEM
 ADMINISTRATIONEM
 SENATVS. LAVDANDO
 COMPROBAVIT
 AEMILIVS. FRATER. ET
 RVFINVS. FRATER. ET
 FLAVII. SILVANVS. ET
 EIRENEVS. SORORIS. FILII
 A. MILITIIS. OB. EXIMIAM
 ERGA. SE. PIETATEM
 PRAESTANTIAMQVE

Ibidem.

FL. PVBLICIAE. V. V. MAX.
 SANCTISSIMAE. ET. PISSIMAE.
 AC. SVPER. OMNES. RETRO
 RELIGIOSISSIMAE. PVRISSIMAE.
 CASTISSIMAEQVE.
 CVIVS. RELIGIOSAM. CVRAM
 SACRORVM. ET. MORVM. PRÆDI
 CABLEM. DISCIPLINAM.
 NVMEN. QVOQVE. VESTÆ. COMPROBAVIT.

Q. VETVRIVS. MEMPHIVS. V. E.

* FICTOR. V. V. DIGNATIONIS. ERGA. SE

HONORISQVE. CAUSA. PLVRIMIS

IN. SE. CONLATIS. BENEFICIIS.

* Scripsi
rr. Elect.
cap. xviii.

Ibidem, de eâdem.

FL. PVBLICIÆ. V. V. MAX

MERITO. SANCTISSIMÆ. AC. PIISSI

MÆ. QVÆ. RITE. ET. PERVIGILI. ADMINIS

TRATIONE. OMNES. GRADVS. LAVDE

CVMVLATA. SACRA. SVA. VENERATA. VI

VIT. VT. SECVLARI. ETATE. ET. MINISTERIO

ADSIT. ET. IN FVTO. PERSEVERET

Q. TARENTIVS. RVFVS. ET. CÆNIA

VERISSIMA. PARENTES

TARENTIÆ. RVFILLÆ. V. V.

CVIVS. MVLT. TEMPORIS. BONITATEM

ET. HVMANITATEM. EIVS. CIRCA. SE

IN. BREVI. SENSERVNT.

Ex his talibus vides adulationes laudesque erga *Vestales Maximas*: apparetque magnas iis opes fuisse, vt dixi, & administrationem permissam, copiamque benignè faciendi. Est & Romæ nuper eruta Statua, quæ adseruatur apud Ill^lum Cardinalem Cæsium: vbi habitus cultusque *Vestalis Maxime*, quem hîc vides. Sed de illo antepetorali variè quæri potest: nec apud veteres opinor reperiri. An proprius ornatus & insigne *Maxime* huius fuit?

H

an &

an & nouitia inferioris æui vsurpatio? cogitetur: tu Statuam vide, ab amico meo *Jo. Hemelario*, optimo & suauissimo viro, descriptam & transmissam. *Statua est*, inquit, *è marmore Pario candidissimo perfectissimi operis, capite, brachiis, & summitatibus pedum mutila: habuit & monile baccatum, è quo bulla dependebat ab humeris, sed illud comminutum est dum statua transportabatur. A tergo apparent vittæ, è collo siue capite in nodum defluentes. capillorum non apparent extremitates. Inscriptio labentis Imperij tempus referre videtur, ob litterarum formas ductusque imperfectiores, & interpunctiones omissas.*

APPROBATIO.

Syntagma istud dignum luce est, quòd ad Priscorum lucem conferat plurimùm. 7. Calend. April.

Guilielmus Fabricius Noviomagus Apostolicus & Archiducalis librorum Censor.



P R I V I L E G I V M C Æ S A R E V M.

R V D O L P H V S S E C V N D V S diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatia, Sclauoniæ Rex, Archidux Austriæ, Dux Burgundiæ, Stiriæ, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fideli dilecto I V S T O L I P S I O gratiam nostram Cæsaream. Postquam inter alia, quæ D E V S immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram sequæ dignam illi præstant, qui diligentem iis ipsis in litteris ac disciplinis operam ponunt; præclarissimam verò & Reipub. vtilissimam, qui eas ita excolunt, ut aliorum menti docendo, scribendo lumina præferant, eosque ex ignorantie tenebris quasi manu educant. Quos excitare, quos amare atque animare, ad dignitatis nostræ munus, ad quod Diuino vocati beneficio concessumque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Litteris possint, acceperimus, insignes te animi ingenii que tui dotes tibi à natura insitas à primis temporibus ætatis tuæ ita litterarum ac disciplinarum studiis excoluisse atque exornasse, ut olim iuuenilibus adhuc annis præclara florentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituiisti, dum vetusta Latine antiquitatis rudera in nouam subinde structuram singulari artificio eleganter conuertisti: ad exquisitam ad eò & raram doctrinam, quæ magnam de te apud doctos quosque viros opinionem excitavit, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes descriptionis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue verseris, flores colligere, concinnare, quibus Lectores mirificè recrees, & eorum pectus ad prudentiam probitatemque informes: haudquaquam prætermittere voluimus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrociniòque nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, acceperimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari fortè velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum,

aut

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hæreditariorum fines, triginta annis proximis à primo editionis die computandis, absque tuo tuorumve hæredum consensu audeat: Hac autem lege addita, ut tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, cum non solum eiusmodi libris, tibi, hæredibusve tuis, auxilio Magistratus, ubicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratori, fraudis vindici; alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiãve exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces compererint, constituta à nobis multa, eos puniri & quibuscunque modis coërceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

Subsign.

RVDOLPHVS.

Iacobus Curtius à Senfftenaw.

Ad mandatum sacre Cæsareæ M^{te} proprium.

Io. Baruitius.

Additum sigillum Cæs. M^{te} in cerâ rubrâ.

H 3

SYM-

SVMMA PRIVILEGII REGIS CATHOLICI.

PHILIPPVS Dei gratia Hispaniarum, &c. Rex Catholicus, diplomate suo sanxit, nequis, IUSTI LIPSI Historiarum in alma Vniuersitate Louaniensi Professoris, & item Historiographi sui libros quoscumque, à Censoribus legitimis approbatos, præter ipsius, heredumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has inferioris Germania ditiones importet, venalesve habeat. Qui secùs faxit, præter librorum confiscationem triginta marcharum auri puri illatione mulctabitur. Vti latiùs patet in litteris, datis Bruxella, XIV. Febr. M. D. XCVII.

Signat.

Verreycken.

SVMMA PRIVILEGII REGIS CHRISTIANISSIMI.

HENRICVS Dei gratia Galliarum & Nauarra Rex Christianissimus, singulari privilegio sanxit, nequis per vniuersos Regnorum suorum fines, IUSTI LIPSI, quos vel hæctenus edidit, vel in posterum editurus est libros, excudere intra decennium præter voluntatem ipsius possit. Qui secùs faxit, præter librorum confiscationem, ter mille florenorum illatione mulctabitur; vti latiùs patet in litteris, datis Parisiis, XIII. Iulij, M. DC. V.


Signat.

Perrochel.

Tibi IOANNES MORETE, pro amicitia quæ mihi cum Plantino (heu, quondam meo) & Plantinianis est ac fuit, tibi, inquam, permitto, vti hoc meum DE VESTA ET VESTALIBVS SYNTAGMA typis tuis excudas ac diuulges. Ne quis alibi alius præter te, cupio siue iubeo, ex lege quam magnus Cæsar & Reges dixerunt.

Iustus Lipsius.





SPECIAL	87-B
PA	20914
8545	Bound with:
A6	87-B 20942
1602	21377
V.2	21407
	21417
	21420
	21562
	21613
	21830

THE GETTY CENTER
LIBRARY



JUSTI LIPSII
OPERA

TOM.
II.